

Tí xroon ikjin ch'ín Pablo chr'énnen ch'án tí sín romanos

Ch'ín Pablo ikjin xroon k'uáyéhe tí nínko chjasin Roma

¹ Janhan Pablo mé t'ahá xra Jesucristo mé kjian tí xroon i. Kjueyána Dios kixin sít'ahá ch'án xra tsjàkua tí tan jína tsaáxinni.

² Tíha mé tsíntáchro Dios senó kixin tsoxiteyá éxí nixja tí xroon nixjaxin tí sín tsíchronka itén ch'án ósé.

³ Tí tan a mé chrónka nkexrí tjen Ìnchéni Jesucristo Xjeen Dios. Jehé ch'án mé tsík'lóna ch'án chojni k'uaxrjeníxin ch'án tí sín tsík'axrjeníxin tí rey David.

⁴ Tí kjuachaxin jié mé kjuakoxin kixin jehe ch'án mé chaxín Xjeen Dios kixin ó xechón ch'án la chóna ch'án Nchakuen Dios imá tjetooan.

⁵ Kjuasáyé Jesucristo k'uáyéheni kjuachaxin kixin sich'eheni ch'án xra sátsjichronkaxínni itén ch'án kixin kaín xín chojni chónhya ch'án kuenté chjasintajni chrókuitekaon sín ch'án la ko chrótjuèhe sín ch'án.

⁶ Jahará k'uék'ejorá éxí tjejó tí jehe sín, a ntá jie la kjueyará Dios kixin chrókuitekáonrá Jesucristo.

⁷ Janhan ikjian tí xroon chr'anhánrá kaín rá tjejórá chjasin Roma. Tjuàhará Dios la kjueyará ch'án kixin tjóá chrók'uejórá. Kjuasáyé It'éni Dios la ko Ìnchéni Jesucristo kixin kjuanjón ch'án kjuaxróxin k'uayéhérá.

Ch'ín Pablo tjinkaon chrókjuitsjehe ch'án chjasin Roma

⁸ Xrankíxixín kjuachaxién Jesucristo tjánchàxian Dios kjuasáya kixin jahará ó kuítekáonrá ch'án la ko nkuíxín chjasintajni nixja sín nkexrí tinkachónkirá ch'án.

⁹ Dios, tí nkexro t'aha xra kaín asenná xrjanka tí tan jína kuènte Xjeen ch'án, mé nohe ch'án kixin xráxín xráxinkavan tí jahará tió nixjaha ch'án.

¹⁰ Xráxín tjáncháha Dios kixin tí chrókjuanjon ch'án kjuachaxin la chrókjuasántsjahará.

¹¹ Kixin tjínkavan chrókjuasántsjahará tí jahará kixin chrókjuínkítsa tí jahará kixin chrók'uitjará jína nkexrí chrók'uejorá ntoá.

¹² Me xikaha tsocháhará la ko tsochàna kixin jnkokoá tinkáchónkini Ìnchéni, jahará la ko janhan.

¹³ Kíchóni, tjínkavan chrókónohará kixin nchónhya veces tjínkavan chrókjuásantsjahará kjánchó naxa xitjahya tsjasán. Tjínkavan chrókjuasán kixin chrókjuít'a xra kuènte Ìnchéni kixin chrókjuachani nchónhya chojni chrókuinkáchónki Dios éxí kjuít'a xra í so chjasin naxa chónhya sín Dios.

¹⁴ T'ichjánxin tsjákoḥa kaín chojni, á chojni griego o á chojni jehya griego o á chojni nohe o á chojni noehya.

¹⁵ Mé xikaha xra ó tjéchonhan chrókjuasán chrókjuákohará tí tan tsaáxinrá tí jahará tjejorá chjasin Roma.

Tí kjuachaxin kuènte tí tan jína

¹⁶ Tósuànahya xrjanka tí evangelio kixin táha ijnko tan jína kixin chóntha kjuachaxin kuènte Dios

chrókuaáxin kaín xín tí chojni chrókuitekaon, mé saoxín tí sín judío la ko kjaxin tí sín jehya judío.

¹⁷ Kíxin tí tan jína kuènte Dios tjakuexin tí jeheni kíxin chrókótjuáxin ijiéni kíxin tinkáchónkini ch'án la jehó ch'án tinkáchónkini. Exí ntáchro xroon itén Dios kíxin: “Tí nkexro kótjóá kíxin kuítekaon sín Dios mé táhó ts'ejóchónxin sín.”*

Tí jìe tjasin chojni

¹⁸ Dios tjen nkaya nkajní mé tsonínkakohen ch'án tí sín jínahya tjasin jìe, mé sinchekjasóte sín ch'án. Tí jìe jínahya tjasin sín mé t'inkákonhen kíxin chrókónohe sín tí nkehe jína chaxín.

¹⁹ Jehé sín ó nohe sín jína nkexrí tjen Dios kíxin jehe ch'án kjuakuexin ch'án tí jehe sín.

²⁰ Tí kjuachaxin kuènte Dios kjónté t'ikonhyani la kjánchó noexínni kíxin tí nkehe kjuích'éna ch'án. Kíxin tí naxa k'ónahya chjasintajni kónoxín kíxin jehó ch'án mé Dios t'etóan la ko chóna ch'án kjuachaxin jnkochrín. La ntá tí sín jínahya xitjahya tsontáchro sín kíxin k'uénoehya sín.

²¹ Kjónté nohe sín kíxin xikaha itjen Dios la tjikosáyehya sín ch'án la ko ni tjanchehya sín ch'án kjuasáya. Tjenkayáxin sín tí nkehe ninkehó sínkíhya kíxin jínahya asén sín la tí sítié ó kuítóhe sín.

²² Kjónté ntáchro sín kíxin imá nohe sín kjánchó imá lontí sín kíxin antsí kjuasin sín jìe.

²³ A ntá ó kjuixin kjuinkí sín tí nkehe tinkáchónki sín la ko kuítekakonyha sín tí kjuachaxién Dios itjen jnkochrín, t'enhya. A ntá ijìe tinkáchónki sín tí nkehe tsíkjanoya tóyóhe chojni it'en. Kjaxin

* **1:17** Habacuc 2.4

tinkáchónki sín koxroxé tsíkjanoyá la ko konche la ko iko chóna noó toté.

²⁴ A ntá xíkaha Dios kuítóhe ch'án tí jehe sín kixin chrókjuich'e sín tí nkehe jínahya tjenkayáxin sín ntá xíkaha ch'e sín ijnko nkehe chrókósuèxin sín ch'ehe kichó sín

²⁵ kixin kuítékakonhya sín tí nkehe chaxín kuènte Dios, a ntá tí nkehe jínahya mé kjueyá sín. Kjuích'éna sín dios kuènte sín tí nkehe tsíkjich'éna Dios. A ntá tí nkexro kjuích'éna tí nkehe la titekakonhya sín. Jehe ch'án mé chrókjuancheheni ch'án kjuasáya jnkochrín kixin jehe ch'án mé kaín tí nkehe síin mé kuènte ch'án. Amén.

²⁶ La ntá xíkaha kjuích'e sín ntá Dios kuítóhe ch'án tí jehe sín kixin chrókjuich'e sín tí nkehe chrókósuèxin sín chrókjuich'e sín. Kjonté tí chojni chjin la kuítóhe sín tí ichjin sín la ntá kjuích'éna sín asén sín chojni ntoá.

²⁷ A ntá kjaxin xíkaha tí chojni ntoá kuítóhe sín chróchóna sín chojni chjin la tjinkaon sín tí nkehe ntoáhya. La ntá ch'e sín nkehe chrókósuèxin sín ch'ehe kichó sín jnkokón ntoá sín. Mé xíkaha mé tí cuerpo kuènte sín mé tsjasótéxin sín tí jiē kjuasin sín.

²⁸ Tjinkakonhya sín tsoxraxinkaon sín Dios ntá jehe ch'án mé kuítóhe ch'án tí jehe sín kixin xíkaha tsjenkayáxin sín tí nkehe jínahya kixin sich'e sín tí nkehe chrókjuich'e hya sín.

²⁹ Nchónhya jiē chóna sín mé tí nkehe ntoáhya ch'e sín, la tjinkaon sín chrókuakja sín í jnko chojni chjin ókjé, la ko tí nkehe jínahya ch'e sín, la ko tjinkaon sín jehó sín chróchóna sín itsjé nkehe, la ko imá tjasin sín jiē, la ko jehe sín chjinóxínhin sín,

la ko tjinkaon sín chrók'óyán sín kíchó sín, la ko itje sín kjuanínkaon, la ko ch'ia sín la ko jínahya sín xriko sín kjuach'ia.

³⁰ T'ántaxínhín sín kíchó sín la ko nínkakonhen sín Dios, la ko jehó sín chrók'ueṭoan sín, la ko nchehnke sín, la ko jehó sín ch'éna sín nkehe jínahya tjasixín chojni jie, la ko tjikosáyehya sín it'é sín la ko iné sín.

³¹ Tienxínhya sín la nchexiteyáhya sín nkehe nixja sín, la ko tjuèhya sín kíchó sín, la ko tjinkakonhya sín sinchek'itjáyenhen sín ichrén jie kjuasinhin kíchó sín, la ko tikonóḡhya kíchó sín.

³² Jehé sín ó nohe sín jína kixin nkexrí k'ueṭoan Dios la jehé sín ó nohe sín kixin tí jie kjuasin sín chrók'uenxín sín, la kjónté xikaha ó nohe sín, la naṡa tjasin sín jie la kḡaxin chéhe sín chrók'uikon sín ókjé nkexro chrókjuasin jie xikaha.

2

Dios nchekitoexín ch'án tí jie tjasin chojni

¹ Mé xikaha jahará xitjahya tsontáchrórá kixin chontahyará jie a ntá tékará jie tí í so sín tjasin jie. A ntá tí xikaha ch'erá la jahará xritjéyará nkexrí chrókjuasótexínrá kḡaxin kixin jahará jnkokón jie tjásinrá.

² Ó noheni kixin ntoá sinchekitoexín Dios tí jie kjuasin chojni kixin sinchekjasóte ch'án tí sín xikaha tjasin jie.

³ A ntá jahará la tékará jie í so chojni ntá jahará kḡaxin la xikaha jnkokón jie tjásinrá. ¿Á tjenkayáxinrá kixin tsjachará tsinkehéra tí sinchekjasótiará Dios ní?

4 ¿Á kjoniehérá tí kjuaxróxin tsjéjehya tjanjon Dios kixin tjechónhen ch'án naxa nínkakuanhyará ch'án? A ntá jahará la kuiénxinhyará kixin Dios tjuàhará kixin tjinkaon ch'án chrókuìtohérá tí nkehe jínahya tjenkayáxinrá.

5 Kjánchó jahará imá icha asánrá, tjinkákonhyará chrókuìtohérá tí nkehe jínahya tjenkayáxinrá, a ntá antsí má nchek'ánkírá tí nkehe jínahya tsjasótexínrá tí yaon tsjixixín tió tsonoxín kixin sinchekjasóte Dios chojni.

6 Jehe ch'án mé tsjenkehe ch'án jnkojnko chojni nkehe tí xrā tsíkjich'e sín.

7 Tsjanjon ch'án kjuachón ts'áyéhe tí sín tjejá sín tí nkehe náxrjón la ko tí kjuachaxin ts'itjáyanhya la ko xráxín kjuích'e xrā jína.

8 A ntá tsonínkaon Dios sinchekjasóte ch'án kaín tí sín nchehnke la ko tí sín tjinkakonhya chrókjuich'e sín tí nkehe jína. A ntá náhí, la íchá má kóxrjínhin sín kjuích'e sín tí nkehe jínahya.

9 Mé xikaha tsjasóte sín la ko kjuaxróxinhya tsonhen kaín tí sín kjuích'e tí nkehe jínahya, mé senó tí sín judío la ko kjaxin tí sín jehya judío.

10 A ntá Dios mé tsjanjon kjuachaxin la ko tsjanjon ch'án kjuaxróxin la ko tsjikosáyehe ch'án kaín tí sín kjuínchexiteyéhe ch'án kjuích'e tí nkehe jína, mé senó tí sín judío la ko kjaxin tí sín jehya judío.

11 Dios la t'ikon kixin kaín chojni la jnkokón sínkí.

12 Kaín tí sín tjasin jie kixin noehya sín tí ley tsíkjin ch'ín Moisés la kjónté chónhya sín tí ley la its'en sín. A ntá tí sín ó nohe tí ley tsíkjin ch'ín Moisés ntá tjasin sín jie, la tí ley a mé tsjanchia jie tsjasótexín sín.

¹³ Jehya tí sín ó chrókuinhón tí ley la ó chrókótjuáxin ijíé sín. Náhí. Tí sín sinchexiteyéhe sín tí nkehe k'uetōan Dios mé tsotjuáxin ijíé sín.

¹⁴ A ntá tí sín jehya judío chóntahya sín tí ley t'etuenhen sín la ntá tió jehó sín chrókjuinchexiteyéhe sín éxí nixja tí ley la jehí jehó sín t'etuenhen asén sín.

¹⁵ Kíxin tí kjuínchexiteyá sín ch'e sín tí nkehe jína mé tjakoxín sín kíxin asén sín xraxinkakonxín sín tí nkehe ntoá la ko asén sín tjanchankíhi sín á jína tjejó sín o náhí.

¹⁶ Itsi tí yaon la Dios mé sinchekitoexín kjuachaxin Ìnchéni Jesucristo kaín nkehe imó kjuích'e chojni éxí nixja tí tan jína tjàkua janhan.

Tí sín judío la ko tí ley tsíkjin ch'ín Moisés

¹⁷ A ntá jahará ntáchrórá kíxin jahará judiorá la tinkachónkirá tí ley tsíkjin ch'ín Moisés la ko nchehñkerá kíxin tinkachónkirá Dios.

¹⁸ Ó nohará tí nkehe tjinkaon Dios la ko tí ley ó kjuakohará kíxin chrókjuéyará tí nkehe jína.

¹⁹ Ihñkerá kíxin nohará tsjákohérá tí sín t'ikonhya la ko jahará mé xrohi ts'inkáséyanxín tí sín ixri sítié, ichrorá.

²⁰ Ntáchrórá kíxin nohará tsjákohérá tí sín noe-hya la ko tsjínkítará tí sín tienxínhya kíxin jahará chontará tí ley chrónka kjuaxrexinkaon jína la ko tí nkehe chaxín, ichrorá.

²¹ Jahará tjákohérá í so chojni, a ntá jahará, ¿nkekuènté tjákoéhyará asánrá xíkaha? Jahará tjákohérá chojni kíxin chrókueéhya sín, a ntá jahará la, ¿nkekuènté tēerá?

22 Ntáchrórá ḱixin xitjahya tsochóna chojni yaá chojni chjin, a ntá jahará la, ¿nkekuènté xikaha ch'erá? Ntáchrórá ḱixin titekákonhyará tí nkehe tsíkjanoya, kjánchó jahará, ¿nkekuènté teerá tí nkehe tjete síin nkaxenhen n̄inko?

23 Nchehnkerá ḱixin chontará tí ley, a ntá jahará chontahyará kjuasáyé Dios ḱixin kjuinchexiteyéhyará éxí k'ueṭoan tí ley.

24 Ntoá ntáchró tí xroon itén Dios ḱixin: “Tí sín jehya judío la t'ántaxính̄in sín Dios ḱixin tí ijjárá.”

25 A ntá tí chaxín kjuinchexiteyará tí ley tsíkjin ch'ín Moisés la ntá jehya chónkó tsíkará xroye. A ntá tí kjuinchexiteyéhyará tí ley la éxí tsíkahyará ninkehó xroye.

26 A ntá tí sín tsíkahya xroye kjánchó titekaon sín nkexrí t'ētoan tí ley la tjejó sín éxí ó tsíka sín xroye kjónté chaxínhya chóna sín.

27 A ntá tí nkexro kuáhya xroye tí cuerpo chóna kjánchó nchexiteyéhe tí ley, mé jehe sín tsjanchia sín j̄ie tí jahará ḱixin jahará kuítekákonhyará kjónté chontará tí xroon nixja tí ley la ko kjónté ó tsíkará xroye.

28 A ntá tí xikaha la chaxínhya judío jahará ḱixin ó ntója ó chontará xroye la chaxínhya tsíkará xroye ḱixin chrítaón cuérporá ó, chontará.

29 A ntá tí chojni chaxín judío la t'ichjánx̄in chróchóna sín xroye nkaya asén sín. Jehya tí ley chrók'ueṭoan xikaha chrókonhen. Náhi. Táha la Nchakuen Dios. Jehya ḱixin chojni chrókóxrj̄inh̄in ḱixin ó nchoxon. Náhi. Dios mé tsoxrj̄inh̄in ḱixin nchoxon tíha.

3

1 ¿A ntá nkehe tsonhen kixin ntáchro sín kixin judío sín la ko nkehe tsonhen kixin tsíka sín xroye?

2 Chaxín xikaha jína kixin Dios kjuanjon tí itén ch'án saoxín k'uáyéhe tí sín judío kixin chrókjuinchexiteyá sín.

3 A ntá ¿nkehe tsonhen tí jnkojín tí jehe sín chrókjuinchexiteyáhya sín? Kjónté xikaha chrókjuich'e sín la, ¿á chrókuítóhe Dios chrókjuinchexiteyáhya ch'án tí nkehe tsintáchro ch'an?

4 Kjá náhí. Dios la sinchexiteyá kaín nkehe tsintáchro ch'án kjónté kaín chojni chrókjuich'ia. Ntáchro xroon itén Dios kixin:

Tsontáchro chojni kixin ntoá tí nkehe ntáchroa.

Tíha mé tsjachaxian tí tsjanchia sín jie.*

5 Tí jie chóntani mé tjakoxín kixin Dios mé nohe nkexrí sinchekitoexín ch'án ijje chojni. ¿A ntá nkehe chróchroni? ¿Á ntoáhya chrókjuich'e Dios kixin chrókjuinchekjasóteni ní? (A ntá janhan nixja éxí nixja chojni ó.)

6 Kjá náhí. A ntá tí jehya ijnko nkexro jína tí jehe ch'án, ¿ntá nkexrí chrókjuinchekitoexín ch'án ijje chojni chjasintajni?

7 A ntá tí chrókjuínkítsa tí kjuach'ia kuéntana kixin chrókónoaxínrá tí nkehe chaxín kuente Dios, ¿a ntá nkekuénté ts'ékaráni jie kixin janhan mé ijnko chojni chónta jie?

8 Tí xikaha la, ¿á chrókjuich'eni tí nkehe jínahya kixin ntá chrókui tí nkehe jína? Mé xikaha ichro iso chojni t'ekani jie kixin xikaha tjakoni, ichro sín. Tí sín a chrókjuasóte sín kixin xikaha ichro sín.

* 3:4 Salmo 51.4

Kaínni chóntani jie

⁹ ¿Ntá nkexrí? Jeheni judíoni la, ¿á antsí má tjetaanni, a ntá tí sín í so la, á náhí? Kjá náhí. Kíxin kaín ni chojni judíoni la ko tí sín jehya judío mé kaín ni kjuínchexiteyéheni tí jie kjuasinni.

¹⁰ Ntáchro tí xroon itén Dios kíxin:
Kohya ninkexró chrókjuich'e tí nkehe jína, la kohya nijnko chojni.

¹¹ Kohya ninkexró tienxín,
Kohya ninkexró chrókjueyá Dios.

¹² Kaín chojni k'uék'aji sín tí ntia jínahya la ko kaín chojni jnkokón k'uáji sín ntoáhya,
kohya ninkexró chrókjuich'e tí nkehe jína la kohya nijnko chojni.†

¹³ Tí isin chojni la éxí tòye tsíxrankehe tsíxravá chojni
kíxin tí nejen chojni ch'iyaxín.

La tí veneno kuènte konche chóna ir'va chojni.‡

¹⁴ Tí ir'va chojni tsíkaón nkehe jínahya la ko kjuanínkaon.§

¹⁵ Xritinká sín kíxin tjinkaon sín chrók'óyán sín chojni.

¹⁶ Tí ntia k'uáji sín tió xíkaha kjuích'e sín mé kjuínchek'itjáyan sín kaín kjuaxróxin k'uéchóna ókjé chojni.

¹⁷ Chónhya sín tí ntia tjanjon kjuaxróxin*

¹⁸ kíxin kjuenkayáxinhya sín chróchrakõnhen sín Dios.†

Mé xíkaha ntáchro itén Dios.

† **3:12** 3.10–12 Salmo 14.1–3, Salmo 53.1–3 ‡ **3:13** Salmi 5.9, 140.3

§ **3:14** Salmo 10.7 * **3:17** Isaías 59.7–8 † **3:18** Salmo 36.1

19 Ó noheni ḱixin kaín tí nkehe nixja tí xroon chóna tí ley mé k'uetuenhen kaín tí sín tinkáchónki tí ley ḱixin ntá kaín chojni chjasintajni chrótání sín ḱixin kaín chojni tsjasóte ḱixin Dios mé sinchekitoexín ijié kaín chojni.

20 Ḱixin ninkexró chrókjuacha chrókótjuáxin ijié sín ḱixin chrókjuinchexiteyéhe sín tí nkehe t'etoan tí ley. Tí ley la jehó ch'e xra tsonoexínni ḱixin chóntani jié.

Tsaáxinni ḱixin tinkáchónkini Cristo

21 A ntá jehya tí ley chrókuaáxinni. La ntá ó kónoxín nkexrí Dios tsaáxinní la kjaxin tí xroon chóna ley la ko tí nkehe nixja tí sín profeta la ó nixja xikaha.

22 Tsotjuáxin ijiéni ḱixin titekaonni Jesucristo ḱixin kaín chojni chrókuaáxin tí tsitekaon sín tí jehe ch'án ḱixin t'ikon ch'án ḱixin jnkokón tsjehe kaín chojni.

23 Ḱixin kaín xín chojni kjuasin jié la k'uáyèhya sín tí kjuachaxin chrókuaáxin sín.

24 A ntá kjuasáyé Dios ḱixin k'uenyákonhenni Cristo Jesús la kótjuáxin ijiéni.

25 Dios mé ichr'án ch'án Cristo, kuámá ijiéni, k'uenyákonhenni ch'án ḱixin chrókuinkáchónkini ch'án ntá chrókuaáxinni. Mé xikaha kjuích'e Dios ḱixin kjuakoxin ch'án ḱixin ntoá kjuenkayáxin ch'án ḱixin kónínkakonhya ch'án kjónté nchónhya jié tsíkjasinni senó.

26 Xikaha kónhen kjuakoxin Dios ḱixin jína ch'án ijie la naxa tjechónhen ch'án sinchetjóá ch'án ijié tí sín kuítekaon Jesús.

27 **A** ntá ¿nkekuènté chrókjuinchehnkeni? Xitjahya sinchehnke chojni nkayakon Dios kixin jehya kixin kjuínchexiteyéheni tí nkehe k'uetōan tí ley ntá chrókuaáxinni. Náhí. Kixin Ìnchéni kuítekaonni ntá kuaáni.

28 Mé xikaha ó noheni kixin tsotjuáxin ijiéni tí tsitekaonni Dios kixin Dios tahya cuenta á kjuínchexiteyéheni tí nkehe k'uetōan tí ley.

29 ¿Xá Dios mé kuènte tí sín judío ó? ¿Á kjaxinhya Dios kuènte tí sín jehya judío? Kjá kjaxin Dios mé kuènte tí sín jehya judío.

30 Kixin kohya í jnko Dios la jehe ch'án sinchetjóá ch'án ijiéni kixin tinkáchónkini ch'an la tahya ch'an cuenta á chóntani xroye o náhí.

31 **A** ntá tí tinkáchónkini Ìnchéni, la ¿á í chrókjuinchexiteyáhyani tí ley? Kjá náhí. Íchá antsí má jína chrókjuinchexiteyéheni tí ley.

4

Tí kjuakoxin ch'ín Abraham

1 ¿Nkehe tsixroni kixin nkehe k'uitja ch'ín Abraham, tí nkexro k'uaxrjeníxinni ósé?

2 Ntá ch'ín Abraham tí chrókótjuáxin ijié ch'án kixin tí xrā kjuích'e ch'án ntá chrókóhnke ch'án, kjónté jehya nkayakon Dios.

3 **A** ntá ntáchro xroon itén Dios kixin: “Ch'ín Abraham kuítekaon Dios ntá táhó kuaáxin ch'án la ko kótjuáxin ijié ch'án.”*

4 Jnkojín chojni kjuích'e xrā la jehya k'uáyéhekoá ch'án tí chichaon. Náhí. Táha la tí xrā kjuích'e ch'án mé kjuacha ch'án.

* **4:3** Génesis 15.6

⁵ A ntá kjónté jnkojín chojni kjuích'ehya ninkehó xra ntá chrókuitekaon ch'án Dios a ntá Dios la sinchetjóá ch'án kjónté tí nkexro chóna jie, kixin tí kuítekaon ch'án Dios la táhó mé kuaáxin ch'án.

⁶ Mé kjaxin tsíntáchro ch'ín David kixin náxrjón tí nkexro kótjóá kixin Dios kuáhya kuentá nkerí jie tsíkjasin ch'án.

⁷ Ntáchro ch'ín David kixin:

Náxrjón tjejó tí nkexro kjuíncheyaon Dios kjónté jínahya kjuích'e sín la kjuakjìn ch'án ijíe sín.

⁸ Náxrjón tjejó tí nkexro kixin Ìnchéni kuáhya ch'án kuentá tí jie k'uéchóna sín.†

⁹ ¿Á jehó tí sín ikuá xroye la náxrjón tjejó sín o á kjaxin náxrjón tjejó tí sín chónahya xroye? Ó chrónkani kixin Dios la kuikonóehe tí ch'ín Abraham kixin kuítekaon tí jehe ch'án la táhó mé kótjuáxin ijíe ch'án.‡

¹⁰ ¿A ntá nkesá tsíkjincheyaon Dios tí ch'ín Abraham? ¿Á ó tsíka ch'án xroye o naxa náhí? Kjá naxa náhí. Senó tsíkjincheyaon Dios tí jehe ch'án.

¹¹ Ntá chr'éxin ch'ín Abraham ikuá ch'án tí xroye éxí ijnko selló kjuakoxin Dios kixin ó kótjuáxin ch'án kixin kuinkáchónki ch'án Dios. Kixin ntá xikaha ts'óna ch'ín Abraham xjeen kaín chojni tinkáchónki Dios, kjónté chojni tsíkahya xroye. Ntá kjaxin jehe sín la Dios sinchetjóá ijíe sín.

¹² La ko jehe ch'ín Abraham mé ts'axrjeníxin ch'án kaín tí sín tsíka xroye kixin ntá chrókuinkáchónki sín éxí kuinkáchónki tí jehe ch'án kjónté naxa tsíkahya ch'án xroye.

† 4:8 4.7-8 Salmo 32.1-2 ‡ 4:9 Génesis 15.6

Tí nkehe tsíntáchro Dios la tsoxiteyá kixin tinkáchónki sín tí jehe ch'án

¹³ Dios tsíntáche ch'ín Abraham kixin jehe ch'án la ko tí sín ts'axrjeníxin ch'án ts'áyéhe sín chjasintajni ts'ejó sín. A ntá tí nkehe ts'áyéhe ch'ín Abraham la jehya kixin kuítekaon ch'án tí ley. Náhi. Ts'áyéhe ch'án tíha kixin kuítekaon ch'án Dios la ntá Dios mé kjuínchetjóá ijíe ch'án.

¹⁴ A ntá tí jehó tí sín tsíkjinchexiteyéhe tí ley ó chrók'uáyéhe sín tí nkehe chrókjuanjon Dios, a ntá tí nkehe tinkáchónkini la ó chrókóchónkó xikaha la ko tí nkehe tsíntáchro Dios la kjá ninkehó sínkíhya tí xikaha.

¹⁵ Kixin tí ley la tjikao kixin tsjasótexín chojni, a ntá tí chrókókohya ley la chrókókohya nkehe chrókjuanchia jie.

¹⁶ Méxra tí nkehe tsíntáchro Dios la kjuasáyé ch'án tsjanjon ch'án kixin kuinkáchónki ch'ín Abraham tí jehe ch'án la ntá Dios sinchekitonhen tíha kaín tí sín tsík'axrjeníxin ch'án. Jehya jehó tí sín tinkáchónki tí ley chrók'uáyéhe sín tí nkehe tsjanjon Dios. Náhi. Kjaxin tí sín tsitekaon éxí kuítekaon ch'ín Abraham mé ts'áyéhe sín tíha. A ntá jehe ch'án mé k'óna ch'án it'é kaín ní.

¹⁷ Éxí nixja xroon itén Dios kixin: “Janhan kjuánjuan kjuachaxin kixin jaha ts'óna it'é nchónhya chojni chjasintajni.”[§] Mé xikaha tjetsjehe Dios kixin jína kuítekaon ch'ín Abraham tí jehe ch'án. Tí Dios a mé sinchexechón tí chojni tsík'en la ko t'etoan ch'án kixin ts'óna tí nkehe naxa kohya.

§ 4:17 Génesis 17.5

18 Kjënté k'uéchóntahya ch'ín Abraham xjeen ch'án la kuítekaon ch'án la chónhen ch'án kíxin ts'óna ch'án it'é nchónhya chojni éxi tsíchronka Dios kíxin xíkaha nchónhya chojni ts'axrjeníxin ch'án.

19 Ch'ín Abraham k'uéchónta ch'án chjina ijnko ciento nánó la kjánchó k'uíjtáyenhya ch'án tinkáchónki ch'án Dios, kjónté jehe ch'án la ko tjan Sara mero its'en sín la ko ó má táda nána sín kíxin naxa chróhónta sín xjeen sín.

20 Ch'ín Abraham la kóxakuenhya ch'án la ko chrakonhya ch'án kíxin tí nkehe tsjanjon Dios. Náhi. Íchá antsí má kuinkáchónki ch'án Dios la ko kjuanchehe ch'án kjuasáyé Dios.

21 Ó nohe ch'ín Abraham kíxin Dios chóna kjuachaxin sinchexiteyá kaín nkehe tsíntáchro ch'án.

22 Dios k'uíkon kíxin jehe ch'ín Abraham kuítekaon ch'án ntá Dios kjuínchetjóá ijíé ch'án.

23 La jehya kíxin tsík'óna tí xroon kíxin tí ch'ín Abraham ó.

24 Náhi. Tsíkjin sín xroon kíxin kjaxin jeheni chrókótjuáxin ijíéni kíxin tsitekaonni Dios. Tíhi mé tí nkexro kjuínchexechón Ìnchéni Jesucristo.

25 Jehe ch'án mé k'uenyákonhenni ch'án kíxin tí jie chóntani. Ntá xechón ch'án inaá kíxin tsotjuáxin ijíéni kíxin ó kuítekaonni tí jehe ch'án.

5

Kótjuáxin tí jie chóntani

1 Kótjuáxin tí jie chóntani kíxin tinkáchónkini Cristo la kjuaxróxin ts'ejókoni Dios kíxin k'uenyákonhenni Ìnchéni Jesucristo.

² Kjuasáyé Cristo kixin jína tsochjineheni Dios kixin tinkáchónkini ch'án ntá ts'áyéheni kjuachaxin kuènte ch'án. Ntá tí kjuachaxin la jína tsjinkjtsa kixin jína ts'ejóni la ko tsochéheni ts'ejóchónhenni kixin ntá tsjintaxín ts'áyéheni tí kjuachaxin jié kuènte Dios.

³ Kjaxin jehya táhó. Náhi. Kjaxin tsochéheni kjónté nchónhya nkehe tsoñhenni kixin ó noheni kixin xikaha tsoñhenni kixin ntá ts'itjani tsoñínkakhonyani.

⁴ A ntá tí xikaha jína chrók'uejóni ntá tsjachani kixin jína ts'ejóchónhenni.

⁵ A ntá tí tjejóchónhenni la tósuèhyani kixin Dios imá tjuèheni ch'án la tí Nchakuen ch'án kjuanjon ch'án mé nchechéhe asénni.

⁶ Tí jehóni xitjahya chrókuaáni. A ntá tió ikui Cristo la k'uenyákonhenni ch'án kixin tí jie chóntani.

⁷ Kjá ninkexró chróntáchro chrók'uenyákonhen sín í jnko chojni kjónté ijnko chojni imá jína tjuèhe kichó. Kohya nkexro xikaha chrókjuich'e.

⁸ A ntá Dios mé kjuakoxin kixin imá tjuèheni ch'án kixin kjónté naxa chóntani jie la Cristo k'úenyákonhenni.

⁹ A ntá Dios mé kjuínchetjuáxin ch'án ijiéni kixin Cristo k'uenyákonhenni ch'án ntá ó noheni kixin jehe ch'án tsaáxinni ch'án kaín tí nkehe chrókjuasótexinni.

¹⁰ Kjónté naxa k'uénínkakhonhenni Dios la jehe ch'án mé kjuanjon ch'án kjuaxróxin kixin k'uenyákonhenni tí Xjeen ch'án. A ntá chaxín tsaáxinni ch'án kixin tjechón ch'án la ntá ijie kjuaxróxin tjejókoni ch'án.

11 La jehya chrókótíhó. Kjaxin tsochéheni kixin tinkáchónkini Dios kixin kjuasáyé Ìnchéni Jesucristo kixin Cristo chóntaxínni kjuaxróxin tí tjen Dios.

Adán la ko Cristo

12 Mé xíkaha ó jnko nkexro kjuasin jie ntá k'uíxin jie kuenté chjasintajni. Mé xíkaha kjuankíxin k'uén chojni ntá kaín chojni kjuankíxin k'uén kixin kaín sín kjuasin sín jie.

13 Kíxin ósé la k'uékohya ley ntá ó xráxín k'uíxin jie chjasintajni kjánchó naxá kohya ley chrókjuanchia jie chrókjuasótexín sín.

14 Desde kjuák'e ch'ín Adán hasta kjuák'e ch'ín Moisés la k'uéchónta kjuachaxin tí kjuach'én kixin tí jie kjuasin sín mé k'uenxín sín. Kjánchó tí jie kjuasin sín la yóehya tí nkehe kjuích'e ch'ín Adán, kuítekakonhya ch'án tí nkehe k'uętoan Dios. Ntá ch'ín Adán yóhe tsotsjehe éxí tí nkexro tsi chr'éxin.

15 Ntá tí jie kjuasin ch'ín Adán la xitjahya chrókóyóhe tí nkehe tsjanjon Dios kixin tí jie kjuasin jnkokoá chojni la ntá nchónhya chojni k'uenxín. A ntá tí tsaáxinni la kjuasáyé Dios ichr'án jnkokoá nkexro mé Jesucristo la antsí má jína tíha kixin tsaáxin nchónhya chojni.

16 A ntá tí jie kjuasin jnkokoá chojni la tóyóehya tí nkehe tsjanjon Dios tsaáxinni. Kíxin tí jie kjuankíxin kjuasótexín chojni kixin kjuasin jnkokoá chojni jie. A ntá tí tsaáxinni la kjuasáyé Dios sinchekaáni ch'án la ko nchetjóá ch'án tí jie chóntani kjónté nchónhya jie kjuasin chojni.

17 Tí kjuach'én la k'uéchónta kjuachaxin kixin tí jie kjuankíxixín kjuasin jnkokoá chojni. A ntá kjuasáyé Dios kjuínchetjóá ch'án tí jie chóntani la

ntá antsí tsochóntani kjuachaxin ts'ejóni jína kixin k'uenyákonhenni jnkokoá nkexro, mé Cristo tíha.

¹⁸ A ntá tí jie kjuasin ch'ín Adán la ntá kaín chojni kjuasin sín jie chrokjuasótexín sín. A ntá ijie la Cristo mé kótjuáxin ijie kaín chojni kixin tí jína ch'án k'uenyákonhenni ch'án.

¹⁹ Mé xikaha kuítekakonhya jnkokoá chojni, mé Adán tíha, ntá nchónhya chojni kjuasin jie. A ntá jnkokoá nkexro jína kuítekaon kjuakoxin, mé Cristo tíha, a ntá nchónhya chojni tsaáxin tí jehe ch'án kjónté k'uéchonta sín jie.

²⁰ Ikui tí ley kuínhin sín ntá kónoxín kixin íchá antsí kjuasin sín jie. A ntá antsí k'uíxin jie la kjónté xikaha la antsí má kuikonóeheni Dios kixin jehe ch'án tsjinkitsani ch'án tsaáxinni.

²¹ Mé xikaha tí jie k'uíxin k'uéchónta kjuachaxin kjuikao kjuach'én chrók'uenxínni. A ntá kjuasáyé Dios kjaxin antsí má chóna ch'án kjuachaxin sinchetjóá ch'án tí ijieni la ko tsjanjon ch'án kjuachón jnkochrín kixin Ìnchéni Jesucristo ikui ch'án k'uenyákonhenni ch'án, tsaáxinni.

6

Ó k'uén tí jie ntá Cristo kjuínchexechónni

¹ A ntá ijie ¿nkehe tsixroni? ¿A naxa chrókjuasinni jie kixin ntá Dios naxa chrókjuakoxin ch'án kixin chrókuikonóeheni ch'án?

² Kjá náhí. A ntá jeheni la éxí chojni tsík'en chrokjuahya tsjasin jie. ¿A ntá nkekuènte naxa chrókjuasinni jie inaá?

³ ¿Á noahyará jahará kixin tí kuíkiteni kixin tinkáchónkini Cristo la yóhe k'uénkoni ch'án?

4 Tí kuíkiteni la éxí yóhē xravákoni Cristo la ko tsík'enkoni ch'án ḱixin ntá ó xechónni ntá chrók'uajini ijnko nt̄ia n̄ixin mé xíkaha Cristo xechónxin ch'án tí kjuachaxin jié chón̄ta tí It'é ch'án.

5 Ḱixin tí chaxín k'uenxín̄ni éxí ik'uén tí jehe ch'án la ntá k̄j̄axin tsoxechónni éxí xechón tí jehe ch'án.

6 Ó noheni ḱixin nkexrí k'uejóni senó mé táha mé k'uenxín Cristo kjuák'enkánixín ch'án ntacruz ḱixin ntá chrók'uitjáyaxín kaín tí jiē k'uekjasinni ḱixin ijie í chrókjuinchexiteyèhyani tí jiē.

7 Tí nkexro ó k'uén la ntá ó kuítóhe tí jiē.

8 A ntá jeheni tí k'uenxín̄ni Cristo la ó noheni ḱixin ts'ejókoni tí jehe ch'án.

9 Ḱixin ó noheni ḱixin Cristo jnkokoqá vez xechón ch'án a ntá í ts'enhya ch'án inaá ḱixin tí kjuach'én í chón̄tahya kjuachaxin ḱixin nax̄a ts'óyán tí jehe ch'án.

10 Tí ik'uén Cristo la ó naá ik'uén ch'án ḱixin k'uenyákonhenni ch'án ḱixin tí ijíeni. Ntá xechón ch'án ijie ḱixin tsjak'eko ch'án Dios.

11 A ntá k̄j̄axin jahará chrókjuenkayáxinrá ḱixin ik'uénrá, xitjahya tsjásinrá jiē ḱixin ntá ijie la xíxechonrá chrókjuich'eherá x̄ra Dios ḱixin tin-kachónkirá Cristo Jesús, mé Ìnchéni tíha.

12 Méxra chrókuitoéhyará ḱixin chrókjan tí jiē chrók'uetuēhen tí cuérp̄orá inaá ḱixin tí jiē chrók'uet̄oan ḱixin chrókjuinchexiteyéhérá tí nkehe t̄jenkayáxinrá.

13 Tjánjonhyará tí cuérp̄orá ḱixin chrók'óna nkehe chrókjuásixínrá jiē. A ntá íchá jína chróchjehérá asánrá Dios éxí ijnko chojni tsík'en ó xíxechón

ínaá. Chjehérá Dios tí cuérporá ts'óna ijnko nkehe sich'exín ch'án xra jína.

14 Kíxin tí jie la í chóntahya kjuachaxin ts'etuenhen tí jahará. Jehya tí ley ts'etōan ijie. Náhi, jehó kjuasáyé Dios.

Kjuíncheyóexin ch'ín Pablo nkexrí tí chojni ch'exón xra

15 A ntá ijie ¿nkexrí? ¿A chrókjuasinni jie kíxin í t'etuenhyani tí ley? Kjá náhi. Kjuasáyé Dios tsaáxinni la kjá í chrókjuasinhyani jie.

16 Jahará ó nohará jína kíxin tí sich'ehe ni ijnko lámo xra la tsitekakönhenni ch'án la tí xíkaha la t'ichjánxin ch'ehe ni xra tí lámo la t'ichjánxin sinchexiteyéhéni ch'án. Mé xíkaha tónhen tí naxa sinchexiteyéhéni tí jie la táha mé ts'enxínni. A ntá tí tsitekaonni Dios la mé chrók'uejóni jnkojína.

17 Jahará la ósé k'uékjásinrá jie, a ntá ijie kjuasáyé Dios kuikonóahará ch'án kíxin kaín asánrá kuítekáonrá tí nkehe xrakohará.

18 A ntá ó kuítóhérá tí k'uékjínchexiteyéhérá tí jie. A ntá ijie ó kjuánjonrá asánrá kíxin sich'erá xra jína kuènte Ìnchéni.

19 A ntá jie nixja éxí ijnko chojni ó kíxin jahará la tiénxinyará jína tí nkehe i. A ntá xíkaha tí senó kjuínchexiteyéhérá tí nkehe ntoáhya la ko jínahya kíxin sich'erá tí nkehe jínahya. A ntá ijie la xíkaha chrókjuánjonrá tí cuérpo kuéntará kíxin chrókjuich'exínrá tí xra jína éxí tjínkaon Dios kíxin ntá jehe ch'án chrókjuínchetjóará ch'án.

20 A ntá tí jahará tió naxa kjuínchexiteyéhérá tí jie la ntá xitjahya sich'erá tí xra jína ntoá.

21 ¿A ntá nkehe chrókjuachará kixin xikaha kjuich'erá tí nkehe chrókósuàxinrá ó? Ntá xikaha kjuéyará tí nkehe ts'énxinrá ó.

22 Na ntá ijie ó kjuin tí nkehe k'uék'etuñhanrá k'uékjásinxínrá jie. A ntá ijie ch'eherá xra Dios. Táha la tsjinkitsa kixin ts'ejoxinrá jína kixin ntá tsjixixín tsotjuáxinrá ts'ayéhérá kjuachón jnkochrín.

23 A ntá tí chrókjuasinni jie la chrókjuachani kixin éxí chrók'uenni ó. A ntá tí nkehe chrókjuinchekitonhenni Dios la kjuachón jnkochrín kixin tinkáchónkini Ìnchéni Cristo Jesús.

7

Kjuíncheyóexin ch'ín Pablo kuente tí sín tsíkótehe

1 Kíchóni, jahará ó choxinrá tí ley la ó nohará kixin tí ley chóna kjuachaxin ts'etuñhen tí chojni naxa tjejóhón ó.

2 Tíha mé ts'axrjexín éxí ijnko chojni chjin tsíkótehe la tí xii tjan chóna kjuachaxin ts'etuñhen tjan kixin naxa tjechón ch'án. A ntá tíó tsík'en tí xii la ntá tí tjachjin la ó kuítóhe tí k'uék'etuñhen ch'án tjan.

3 A ntá tí jehe tjan chrókuakja í jnko chojni ntoa tí naxa tjechón xii tjan la ó chrókjuasin tjan jie. A ntá tíó tsík'en xii tjan la jehe tjan la ó kuítóhe tí k'uék'etuñhen ch'án tjan la jína tsotehe tjan í jnko chojni ntoa la jehya jie tíha.

4 Mé xikaha jahará kíchó ni mé k'uenyákonhenni Cristo la ntá jahará la éxí tsík'enrá kixin í t'etuñhyará tí ley la éxí chrókuákjára í jnko xiará la mé xikaha tinkáchónkirá Cristo. Cristo mé

xechón ch'án ínaá ḱixin ntá jína chrókjuich'eheni xra Dios.

⁵ Tió naxa k'uékjasinni j̄ie a ntá tí ley chrókjuich'e xra ḱixin chrókjuasinhyani j̄ie, a ntá íchá antsí má kjuasixínni j̄ie tí cuerpo kuènténi, la táha mé kjuix̄in tí ts'énxínni.

⁶ A ntá ijie la éxí yóhe ik'uénni, a ntá tí ley chóntahya kjuachaxin naxa ts'etueñhenni. A ntá ijie íkohya nkehe t'inkákonhen ḱixin jína sich'eheni xra Dios ḱixin k'ónani ijnko chojni n̄ixin ḱixin tí Nchakuen Dios k'uáyéheni. A ntá í t'etueñhyani tí ley ntaxin tsík'óna.

Tí j̄ie naxa chonta

⁷ A ntá tí x̄ikaha la, ¿nkehe chróchroni? Ḱixin tí ley la, ¿á j̄ie táha ní? Kja náhí. Kjánchó janhan chrókónonahya nkehe tí j̄ie tí chrókohya tí ley chróchrónka. Chrókónonahya ḱixin tí nkehe ókjé chrókjuakéhya asenná tí chróchrónkahya tí ley ḱixin chrókjuakéhya asenná tí nkehe ókjé.

⁸ A ntá tió kónòna tí ley a ntá tí j̄ie antsí kjuacha k'uet̄oan. La ntá k'uix̄in kaín nkehe ntáchro asenná. A ntá tí chrókohya ley la chrókónoxínhya tí j̄ie chrók'uenxian.

⁹ A ntá tí ósé la nonahya nkehe tí ley. A ntá tió nòna nkehe tí ley, a ntá antsí kjuásian j̄ie la ntá ó nòna ḱixin tí j̄ie kjuásian me ts'énxian.

¹⁰ Mé x̄ikaha kónhen ḱixin tí ley chrókjuanjon kjuachón ntá kjuik̄ao tí ts'énxínni.

¹¹ Ntá tí j̄ie mé kjuacha k'uet̄oan ḱixin sintaxiteyáhya tí ley. A ntá tí ley mé kjuanchia j̄ie ts'énxian.

12 Mé xikaha tí ley la chaxín jína la ko tí nkehe t'et̩oan Dios la kjaxin jína.

13 Mé xikaha ti nkehe jína la ǵá táha chrók'uénxiān? Kjá náhí. Tí jie kjuásian mé ts'énxian. Mé xikaha kjuakoxin tí nkehe jie kixin tsonoxín tí jie kixin tí ley la jína. Mé xikaha kjuakoxin tí ley kixin tí jie tjasin chojni mé imá jínahya tíha.

14 Ó noheni kixin tí ley la kuènte Dios tíha. A ntá janhan la kjuintaxiteyáha tí ntáchro asenná kixin tí jie kjuacha k'uetuanna.

15 A ntá tí janhan la tí nkehe tjét'a la kjaxin naxa tianxínhya kixin janhan la t'ahya tí nkehe tjínkavan chrókjuít'a, a ntá ijie mé it'a tí nkehe tóxrjínahya chrókjuít'a.

16 A ntá tí nkehe tjínkakhonhya chrókjuít'a la tíha me it'a la mé xikaha tjátsoanxián kixin tí ley la jína.

17 A ntá jehya janhan it'a tíha. Náhí tí jie chonta mé ch'e tíha.

18 Kixin janhan ó nòna kixin tí ntáchro asenná la kohya nkehe jína chrókjuít'a. Tjínkavan chrókjuintaxiteyá tí nkehe jína kjánchó tjachahya sit'a tíha.

19 T'ahya tí nkehe jína chrókjuít'a. Tí nkehe jínahya tjínkakhonhya chrókjuít'a mé it'a.

20 A ntá tí it'a tí nkehe jínahya tjínkakhonhya chrókjuít'a la ntá jehya janhan it'a tíha. Náhí. Tí jie chonta mé ich'e tíha.

21 Tónòna tíhi. Tí tjínkavan chrókjuít'a tí nkehe jína la mé íchá antsí it'a janhan tí nkehe jínahya.

22 Kjónté xikaha la tóxrjìna chrókjuintaxiteyáha tí ley kuènte Dios.

23 T'íkuān ḱixin tí nkehe ntáchro asenná mé t'ínkákonhēn tí nkehe t́ínkávan chrókjuít'a. A ntá ti jīe chonta mé éxí t́échjínaxián tíha.

24 Nōa tí janhan. ¿Xá nkexro chrókjuātsēn tí jīe chóna tí cuerpo kuèntāna chrók'uénxian?

25 Kjuasáya t́jahā Dios ḱixin ikui Ìnchéni Jesu-cristo kuaáxinni. Mé xíkaha tí janhan la it'ona tjenkayáxian ḱixin chrókjuíntaxiteyáha Dios a ntá tí t'ona mé ntáchro asenná chrókjuíntaxiteyáha tí nkehe kuènte tí jīe.

8

Tjejóchónxinni Nchakuen Dios

1 A ntá ijie tí sín tinkáchónki Cristo Jesús la koha jīe chrókjuasótexín sín. Jehé sín í t́ínkakonha nchexiteyá sín xíkaha ntáchro asén sín. Jehó t́ínkaon sín sinchexiteyéhe sín Nchakuen Dios.

2 Ḱixin tí nkehe t'ētōan Nchakuen Dios mé tjanjon kjuachón ḱixin tinkáchónkini Cristo Jesús. Tíha mé kjuātsēn tí nkehe kuènte jīe chrók'uenxínni.

3 A ntá Dios kjuích'e tí nkehe kjuachahya kjuích'e tí ley kuènte ch'ín Moisés ḱixin jeheni kjuachahyani chrókjuinchexiteyéheni tíha. A ntá Dios mé ichr'án ch'án Xjēen ch'án k'óna éxí chojni. La xra ó kui ch'án k'uenyákonhēn ch'án tí ijíeni kaín ni ntihi chjasintajni la kjuātsēn ch'án tí jīe chrók'uitjāyanxínni.

4 Mé xíkaha kónhen ḱixin ntá jeheni jína chrókjuinchexiteyéheni tí nkehe t'ētōan tí ley la chrókjuinchexiteyéhyani tí nkehe ntáchro asénni ó. Náhí. Chrókjuinchexiteyéheni tí nkehe ntáchro Nchakuen Dios.

⁵ A ntá tí sín tjinkaon nchexiteyéhe tí nkehe ntáchro asén sín ntá táhó tjenkayáxin sín. A ntá tí sín tjinkaon nchexiteyéhe Nchakuen Dios la ntá xritjeyá sín tí nkehe kuente Nchakuen Dios.

⁶ A ntá tí sín tóxakonhen tí nkehe ntáchro asén sín la táhó ts'enxín sín. A ntá tí sín tóxakonhen tí nkehe kuente Nchakuen Dios la tsochóntaxín sín kjuachón la ko kjuaxróxin.

⁷ A ntá tí sín imá tóxrjínhin tí nkehe ntáchro asén sín ó la mé nínkakonhen sín Dios kixin tjinkakonhya sín la ko titekakonhya sín tí ley.

⁸ Tí sín tóxrjínhin sín tí nkehe ntáchro asén sín ó la xitjahya sinchechéhe sín Dios.

⁹ A ntá jahará la nchexiteyéhyará tí nkehe ntáchro asánrá. Náhí. Jahará nchexiteyéherá Nchakuen Dios tí chaxín chontará Nchakuen Dios. A ntá tí nkexro chóntahya Nchakuen Cristo la í tinkáchónkihya sín Cristo.

¹⁰ A ntá tí Cristo tjejókoará tí jahará la tí asánrá la tjechón kixin Dios kuikonóahará, kjuínchetjóá ch'án tí ijiará, kjánchó tí cuerpo la éxí tsík'en kixin tí jie chontará.

¹¹ A ntá jahará ó chontará Nchakuen Dios, tí nkexro kjuínchexechón Cristo Jesús. Tí Dios a mé kjuínchexechón Cristo la ntá kjaxin tsochjéhe ch'án kjuachón nixin tí cuerpo kuéntará kjónté chóna jie kixin tí Nchakuen Dios chontará jahará.

¹² Mé xikaha kichó ni, ó chóntani nkehe sinchexiteyéheni, kjánchó í chrókjuenkayáxinhyani tí nkehe ntáchro asénni.

¹³ A ntá jahará tí chrók'uejorá éxí ntáchro asánrá la tíha la mé chrók'uénxínrá. A ntá jahará ó chontará Nchakuen Dios ntá chrók'uen tí nkehe

ntaxin kjuenkayáxinrá la ntá jehó Nchakuen Dios chrók'uejochonxínrá.

14 Kaín tí nkeexo t'etuenhen Nchakuen Dios la mé ó k'óna xjeen Dios.

15 Ntá Nchakuen Dios ó k'uayéhérá jahará la jehya tí nchakuen tí nkehe k'uék'etuanhanrá ósé kixin chróchrakonrá. Náhí. Ntá tí Nchakuen chóntani la k'ónaxínni xjeen Dios. A ntá tí Nchakuen ch'án nchexraxinkaonni tsontáchroni kixin: “It'éni Dios kuéntá tí jeheni.”

16 Tí Nchakuen Dios tónoexín nchakuenni kixin k'ónani xjeen Dios.

17 A ntá ó k'ónani xjeen ch'án la kjaxin tsjanjon ch'án tí nkehe ts'áyéheni éxí tsíntáchro ch'án ósé. Mé ts'áyékoni Cristo tí nkehe tsjanjon Dios. Tí chaxín tsjasóteni éxí Cristo kjuasóte ntá chr'éxin ts'ejókoni ch'án kjuaxróxin.

Tí kjuachaxin jié itsi chr'éxin

18 A ntá ijie la tóxakuenhyani kjónté nkehe ts'atsínkani tsjasótexínni kixin tíha la ninkehó sínkíhya kixin tíha la xitjahya tóyóhe tí nkehe ts'áyéheni chr'éxin kixin antsí má jína náxrjón tíha.

19 Tí nkehe tsík'óna tjejóchónhen kixin ts'ikon tí sín tsík'óna xjeen Dios.

20 Kjónté kaín nkehe tsík'óna siín la ts'itjáyan tíha la jehya kixin xikaha tjinkaon tí nkehe tsík'óna. Náhí. Jehí xikaha tsík'etōan Dios. Ntá tjejóchónhen kaín nkehe tsík'jich'éna Dios

21 kixin chróchónta kjuachaxin chrók'uitjáyanhya. Ntá náxrjón ts'ixin kaín nkehe éxí náxrjón ts'ejó tí sín tsík'óna xjeen Dios.

22 Ó noheni kixin kaín tí nkehe kjuích'éna Dios la naᵗᵗ tsjasóte éxí yóhe tjotéxin ijnko chojni nchekokjíhi xjeen.

23 A ntá jehya jehó tí nkehe tsík'óna t'ikon chojni chrókjoté. Náhi. Kjaxin jeheni tjasóteni kjónté chóntani Nchakuen Dios kixin tí Nchakuen Dios la mé tí nkehe xrankíxixín kuákjani la naᵗᵗ ts'áyéheni inaá tí nkehe naᵗᵗ tsjanjon Dios. Tjejótjasóteni la ko tjejóchónhenni kixin tsjintaxín ts'ónani xjeen Dios la ko ts'áyéheni tí cuerpo chónhya ts'en.

24 Mé ó kuaáxinni la naᵗᵗ tjejóchónhenni tí nkehe t'ikonhyani. Tí k'uíkonní tí nkehe tjejóchónhenni ntá t'ichjánxinhya chrók'uejóchónhenni. Tí nkehe ó t'ikonní la t'ichjánxinhya chrók'uejóchónhenni naᵗᵗ chrók'uikonní inaá.

25 A ntá tí chónhenni tí nkehe naᵗᵗ t'ikonhyani la ntá t'ichjánxín tsonínkakonhyani tsochónhenni.

26 Mé kjaxin xíkaha tí Nchakuen Dios tjinkítsani tí noehyani nkexrí tsonixjeheni Dios kixin chaxín noehyani tsonixjeheni ch'án éxí chrónixjani. A ntá tí Nchakuen Dios tjinkítsa nixjaxín ch'án tí jeheni kjónté noehyani nkexrí tsochrónóaxinni éxí tjinkaon ch'án.

27 Dios mé nohe ch'án nkehe tónhen asénni la nohe ch'án nkehe ichro tí Nchakuen ch'án kixin tí Nchakuen ch'án mé chrónóaxín éxí tjinkaon Dios la nixjaxín ch'án tí sín tinkáchónki Dios.

28 Ó noheni kixin Dios la k'ueᵗoan kaín nkehe chrók'uaxrje jína kixin tí sín tjuèhe ch'án kixin tsíkjeyá ch'án sín kixin xíkaha tjinkaon ch'án.

29 Tí sín tsíkjeyá Dios ósé la ntá tsík'íyehé ch'án kixin ts'óna sín éxí tí Xjeen ch'án kixin ntá tí Xjeen ch'án mé ts'etuenhen nchónhya tí sín kíchó ch'án.

³⁰ Mé xíkaha tí sín tsíkjeyá Dios ósé mé kjaxin k'uíyehé ch'án sín la ko tí sín k'uíyehé ch'án la kjuínchetjóá ch'án ijíé sín la ntá tí sín kjuínchetjóá ch'án ijíé la kjuanjon ch'án kjuachaxin kuènte ch'án tsochónta sín.

³¹ ¿A ntá nkehe chróchroni tí xíkaha? Tí Dios tjuèhe tí jeheni, ¿a ntá nkexro chrókjuacha chrókónínkakohen tí jeheni?

³² Kíxin Dios la kjiakuènhya tí Xjeen ch'án. Kjuanjon ch'án k'uenyákonhenni kaín ni, a ntá tí ó kjuanjon ch'án Xjeen ch'án la kjá kaín nkehe chrókjuanjon ch'án.

³³ ¿Nkexro chrókjuacha chrókjuanchia jje chrókónínkakohen tí sín kjueyá Dios? Kíxin Dios la ó kjuínchetjóá ijíé tí sín a.

³⁴ ¿Nkexro chrókjuinчекjasóte tí jehe sín? Kíxin Cristo la ó k'uenyákonhen sín la kjaxin xechón ch'án ínaá la itjen ch'án tí tja chjina Dios tjen nkaya nkajní la tjechronòa ch'án kíxin kaín tí jeheni.

³⁵ ¿Xá nkexro chrókuakitsjeheni tí tjuèheni Cristo? Kjónté ichrén nkehe chrókónhenni la ko chrókónínkakohen chojni tí jeheni la ko kjónté chrók'uenxínni kjinta la ko chróchóntahyani ikéni o kjónté tí kjuaxikaon chrók'uenxínni la chrókuítøehya ch'án tí jeheni.

³⁶ Éxí ntáchro xroon itén Dios kíxin: Tí tinkáchónkini tí jaha la síin kjuaxikaon kaín yaon chrók'uenxínni.

Chrók'óyánni sín éxí t'óyán sín kolélo tí matanza.*

³⁷ Kaín tíha la antsí chrókjuachaxínni kíxin kjuachaxién tí nkexro tjuèheni.

* 8:36 Salmo 44.22

³⁸ Ó noheni kixin ninkehó nkehe tsjachahya tsak-itsjeheni tí tjuèheni Dios. Kjónté tí its'enni, o kjónté tí tjejóchónni, o kjónté tí sín ángel, o tí kjuachaxién tí jínahya, o kjónté tí nkehe sitónhen ijie, o tí nkehe tsonhen chr'éxin,

³⁹ o kjónté tí nkehe siín nkaya nkajní, o tí nkehe imá ninka siín chjasintajni, o í jnko nkehe kjuích'éna Dios. Mé kohya nijnko tí nkehe a tsjacha tsakitsjeheni tí tjuèheni Dios kjuakoxin tí jehe ch'án kixin k'uenyákonhenni Ìnchéni Jesucristo.

9

Dios kjueyá tí sín Israel

¹ Ntoá xrjanka kixin janhan ijnko chojni tinkáchónki Cristo la t'ayahya. Tí nkehe tjenkayáxian la Nchakuen Dios nchexraxinkaonna kixin chaxín.

² Imá t'ává asenná la ko náxrjónhya tjèn

³ kixin tjínkavan kjónté chrók'uitjáyanxinna tí tinkachónkia Cristo kixin ntá jína chrókuinkáchónki Cristo tí sín kichiná naxa kjéhyana.

⁴ Jehe sín mé tsík'axrjeníxin sín tí sín Israel la Dios k'uáyéhe sín éxí xjeen ch'án la ko Dios chónthehe tí jehe sín la kjuanjon kjuachaxién ch'án la kjaxin k'uáyéhe sín tí nkehe k'uətoan Dios la ko tí ley tsíkjin ch'ín Moisés la ko k'uáyéhe sín kjuachaxin ts'ətoan sín kixin nkehe tí xra tsonhen nkaxenhen njnko la ko k'uáyéhe sín tí nkehe tsíntáchro Dios.

⁵ Tsík'axrjeníxin sín tí sín tsík'axrjeníxinni ósé la kjaxin Cristo tsík'axrjeníxin tí sín israelita tió k'óna ch'án chojni. Jehe ch'án mé Dios kuènte kaín nkehe la tinkáchónkini ch'án jnkochríxín. Amén.

6 **A** ntá tí nkehe chrókuakja tí sín Israel kjuanjon Dios la jehya kixin chróxiteyáhya tíha. Náhí. Kixin jehya kaín tí sín tsík'axrjeníxin tí sín israelita mé chrók'óna sín chojni chjasin Israel.

7 Kixin kénhya tí sín k'uaxrjeníxin ch'ín Abraham chrók'óna xjeen ch'án. Dios mé tsintáche ch'ín Abraham kixin: “Tí sín ts'óna kjéhya jaha mé ts'axrjeníxin sín ti ch'ín Isaac.”*

8 Tíhi mé tienxínni kixin ninkexró xitjahya ts'óna xjeen Dios kixin tí tsík'axrjeníxin sín chojni ó. Náhí. Jehó tí sín tinkáchónki tí nkehe tsíchenka Dios tí ch'ín Abraham mé jehe sín mé chaxín tsík'axrjeníxin sín ch'án.

9 Tí nkehe tsíchenka Dios tí ch'ín Abraham mé tíhi: “Itsi ijnko yaon mé tjan Sara sich'éna tjan ijnko xjan.”†

10 **A** ntá jehya táhó. Náhí. Kjaxin tí yaá chánjan tsík'jich'éna tjan Rebeca mé chóna jnkokoá it'é xjan mé it'in Isaac, mé tsík'axrjeníxinni ch'án.

11 **A** ntá tí xjan la naxa kokjéhya xjan la ninkehó nkehe jína o jínahya kjuích'e xjan. Ntá kjuakoxin Dios kixin chóna ch'án kjuachaxin éxí tsíkjenkayáxin ch'án tsjeyá ch'án nkexro ts'íyehé ch'án la tahya ch'án kuentá nkehe tí xra kjuích'e sín.

12 Ntá kjónté la ntá chenka ch'án tí tjan Rebeca kixin: “Tí ch'ín sao mé sich'ehe xra tí ch'ín tsoyo.”‡

13 Mé kjaxin xikaha ichro xroon itén Dios kixin: “Tjuaha Jacob, a ntá Esaú la náhí.”§

14 ¿A ntá nkehe chróchroni? ¿Á ntoáhya

* 9:7 Génesis 21.12 † 9:9 Génesis 18.10 ‡ 9:12 Génesis 25.23

§ 9:13 Malaquías 1.2-3

tjenkayáxin Dios? Kjá náhí.

¹⁵ Kíxin tsíntáche Dios tí ch'ín Moisés kíxin: “Tsotjuahá tí nkexro tjínkavan tsotjuahá la ko tsíkonóahá tí nkexro tjínkavan tsíkonóahá.”*

¹⁶ Jehya éxí tjinkaon chojni o jehya kíxin tí nkehe ch'e chojni. Náhí. Ó jehí Dios tsíkíkonóehé ti jehe sín.

¹⁷ Tí ntáchro xroon itén Dios mé nixjehe Dios tí ch'ín rey Egipto kíxin: “Kjuánjuan kjuachaxin kíxin jaha k'óna rey kíxin tjínkavan chrókjuákoxian kjuachaxin kuèntana kíxin ntá kuénté chjasintajni chrókónohe la chrókuitekaon tí nina.”†

¹⁸ Mé xikaha tí tjinkaon Dios tsíkonóehé ch'án chojni la tsíkonóehé ch'án, a ntá tí nkexro tjinkakonhya ch'án tsíkonóehé ch'án la tsíkonóehya ch'án.

¹⁹ A ntá tsontáchrora kíxin: “A ntá tí xikaha la, ¿nkekuénté t'eka Dios chojni jie? ¿Nkexro chrókjuacha chrókjuanjonko tí nkehe t'etoan Dios?”

²⁰ ¿Xá nkexro tí jahará kíxin chróntácherá Dios xikaha? ¿Á ti chí tsík'óna nchetje chróntáche tí ínché chí kíxin: “¿Nkekuénté xikaha kjuich'énani?” chróchro.

²¹ A ntá kjaxin tí nkexro ch'éna chí mé chónta kjuachaxin tjinkaon sich'éna ch'án tí nkehe tóxrjínhín ch'án sich'éna ch'án, tí tjinkaon ch'án nchetje sich'éna ch'án nkehe imá náxrjón o tjinkaon ch'án sich'éna ch'án nkehe náxrjónhya.

²² Tjinkaon Dios chrókjuákoxin ch'án tí kjuachaxin kuénte ch'án chrókjuinchekjasóte ch'án chojni la kjónté xikaha kónhen la kjuacha

* 9:15 Éxodo 33.19 † 9:17 Éxodo 9.16

ch'án kónínkakhya ch'án la kuikonóehē ch'án tí sín chrókjuinčekjasóte ch'án kixin chrókjuinček'itjáyan ch'án sín.

23 Mé xikaha kjuích'e ch'án kjuakoxin ch'án tí kjuachaxin imá jié chóna ch'án kixin jehe ch'án kuikonóeheni ch'án kixin xikaha tsíkjenkayáxin ch'án ósé kixin náxrjón chrók'uejókoni tí jehe ch'án.

24 Mé xikaha Dios tsíkjejá ch'án iso tí sín judío la ko iso tí sín jehya judío.

25 Mé xikaha ntáchro tí xroon tsíkjin ch'ín Oseas kixin:

Tí sín jehya chjasenná la mé sintak'ian chjasenná. La tí sín k'uétjuahya mé tsotjuaha sín ijie.‡

26 Tí chjasin ntiha tsintáchro ch'án kixin: “Jahará jehya chjasenná”,

a ntá ijie sintak'ian xjeen Dios tjechón.§

Mé xikaha ichro itén Dios.

27 Kjaxin nixja ch'ín Isaías kuènte tí sín israelita tsintáchro ch'án kixin: “Nchónhya chojni ts'axrjenixin tí sín Israel éxí tí nchónhya nchesen síin ntayaon kjánchó tsjéhya tí jehe sín tsjacha sín tsaá sín.

28 Ntá tjoka tsonhen tí nkehe tsintáchro Ìnchéni sinchexitejá ch'án.”*

29 Ntá kjaxin ch'ín Isaías tsintáchro ch'án ósé kixin: Tí Ìnchéni chóna kaín kjuachaxin kuítóehya chrók'uitjáyan kaín tí sín k'uaxrjenixin Israel éxí k'uitjáyan tí sín chjasin Sodoma la ko Gomorra.†

Tí sín judío la ko tí tan jína

‡ 9:25 Oseas 2.23 § 9:26 Oseas 1.10 * 9:28 Isaías 10.22–23

† 9:29 Isaías 1.9

³⁰ ¿Ntá nkehe tsixroni? Tí sín jehya judío kjueyáhya sín Dios sinchetjóá ijíé sín ntá kjónté la k'uitja sín kixin tsotjóá ijíé sín kixin tinkáchónki sín Cristo.

³¹ A ntá tí sín israelita chrókjuinchexiteyéhe sín ley kixin chrókótjuáxin ijíé sín kjánchó kjuachahya sín kjuínchexiteyéhe sín tíha.

³² ¿A ntá nkekuènté kixin xikaha k'uitjahya sín nkexrí chrókuinkáchónki sín Dios? Kixin kjueyáhya sín nkexrí chrókjuinchetjóá ch'án ijíé sín kixin tinkáchónki sín ch'án. Jehó tí xra kjuích'e sín chrókuaáxin sín, ichro sín. La méxra xikaha tjen tí xro kóténkixin sín.

³³ Mé xikaha chronkaxín xroon itén Dios kixin: Mé xikaha kjuaké tí xro chjasin Jerusalén mé tí xro tsóténkixin sín la ko tí tjó ts'ánótjénxin sín. A ntá tí sín chrókuitekaon tí jehe la chrókósuèhya sín.‡

10

¹ Kíchóni, kaín asenná níxjaha Dios kixin tjínkavan kixin tí sín israelita chrókuaá sín.

² Janhan ntáxrjan kixin tí sín israelita imá tjínkaon sín chrókjuich'ehe sín xra Dios kjánchó chaxínhya kixin jehe sín la tienxínhya sín.

³ Kjaxin noehya sín kixin nkexrí chrókjuinchetjóá Dios tí ijíé sín. A ntá jehó sín xritjeyá sín nkexrí chrókótjóá sín la tjínkakonhya sín chrókjuinchexiteyéhe sín Dios.

⁴ A ntá Cristo mé kjuínchexiteyá kaín níxja tí ley. A ntá ijie kaín tí sín kuítekaon tí jehe ch'án mé sinchetjóá ch'án ijíé sín.

‡ 9:33 Salmo 118.22

⁵ A ntá tí chrókótjóá ijié sín kixin tí ley la ch'ín Moisés mé tsíkjin ch'án xikihi: “Tí nkexro chrókjuinchexiteyéhe kaín tí ley la táhó chrókuaáxin sín.”*

⁶ A ntá tí chrókjuínchetjóá Dios tí ijiéni kixin tí tinkáchónkini ch'án ó mé ntáchro xikihi: “Ntáchrohyará kixin, ¿Xá nkexro sáchrókjuí nkaya nkajní? (Tí xikaha la t'axrjexín kixin naxa chrókui Cristo.)

⁷ La ko ntáchrohyará kixin: ¿Xá nkexro chrók'uinkajin tí imá ninka?” (Mé t'axrjexín tíha kixin chrókjuíkajín sín Cristo chrók'uaxrjetaón ch'án kixin itjen ch'án tí siín tí sín tsík'en, ichro sín.)

⁸ ¿A ntá nkehe ichro? Ntáchro kixin: “Itén Dios la chjinaxón tjen tí tjejorá kixin ó nohará la ko xraxinkaon asánrá.”† Tí tan a mé tí nkehe tinkáchónkini kjuakoni.

⁹ Tí ir'va tsontáchroxian kixin choxian Jesucristo mé Ìnchéni la ko tí asán tsitekaon kixin Dios kjuínchexechón ch'án ntá kjaxian tsaá.

¹⁰ A ntá tí asán tsitekaon la nta Dios sinchetjóá ch'án tí jaha la ko tí ir'va tsontáchroxian kixin choxian Jesucristo ntá sinchekaá ch'án tí jaha.

¹¹ Ntáchro xroon itén Dios kixin: “A ntá tí sín chrókuitekaon tí jehe ch'án la chrókósuèhya sín.”‡

¹² Dios la t'ikon jnkokón tsjehe kaín chojni á tí sín judío o á tí sín jehya judío. Tí Ìnchéni la mé Ìnché kaín chojni la tsjanjon ch'án kaín nkehe t'ichjánxinhin kaín tí sín tjanchehe ch'án nkehe.

¹³ Mé xikaha ntáchro xroon itén Dios kixin: “Kaín

* **10:5** Levítico 18.5 † **10:8** Deuteronomio 30.12-14 ‡ **10:11** Isaías 28.16

tí sín tjanchaxín nkehe ihnié Ìnchéni la tsaá sín.”§

14 ¿A ntá nkexrí chrókjuanchehe sín ch'án kixin chrókjuinkitsa ch'án sín tí naxa kuitekakonhya sín ch'án? ¿A ntá nkexrí chrókuitekaon sín tí jehe ch'án tí naxa kuienhya sín nkexro tí jehe ch'án? ¿A ntá nkexrí chrókuinhin sín tí kohya nkexro tsjakohe sín tí itan a?

15 ¿La nkexrí chrókjuichronka sín tí tan tí kohya nkexro ichr'án sín sátsji? Éxí ntáchro xroon chóna itén Dios kixin: “Náxrjón tí sín xrichronka itan jína.”*

16 Kjánchó kénhya sín titekaon sín tí itan tsaáxinni. Tsintáchro ch'ín Isaías kixin: “Ìnchéni ¿xá nkexro ó kuitekaon tí tan xrichronkani?”†

17 Méxra t'ichjánxin tsinhin sín, a ntá chrókuitekaon sín, a ntá tí tan tsinhin sín mé itén Cristo.

18 A ntá tjánchánkía kixin: ¿Á kuienhya sín tí tan? Kjá ó kuínhin sín. Ntáchro xroon itén Dios kixin: A ntá tí nkehe kjuako sín la ó kuínhin chojni kuenté chjasintajni.

Tí nkehe nixja sín la ó kjuixraká hasta kjuèxin chjasintajni.”‡

19 Ntá tjánchánkía inaá: ¿Xá tí sín Israel la naxa kíenxínhya sín ní? Senó ntáchro ch'ín Moisés kixin: Ijnko chjasin jehya chjasin kuéntana la tsoninkákonhénra sín kixin ijnko chjasin tjinkakonhya tsinhin la tsoninkákonhénra sín.§

20 Ntá ntáchro ch'ín Isaías kixin:

§ 10:13 Joel 2.32 * 10:15 Isaías 53.1 † 10:16 Isaías 53.1

‡ 10:18 Salmo 19.4 § 10:19 Deuteronomio 32.21

Tí sín xritjeyáhya tí janhan la mé tí sín a mé k'uitja sín tí janhan.

La ko kjuákuaxian tí sín kjuanchankíhya kixin nkexro tí janhan.*

²¹ La ko nixja ch'ín Isaías kuènte tí sín israelita kixin: “Kuenté yaon k'uíyahā ijnko chjasin siín chojni titekakonhya sín la ko jìehē sín.”†

11

Tí sín Israel tsíkjeyá Dios

¹ A ntá ijie tjánchánkiá kixin: ¿Dios la á kuítóhe ch'án tí sín Israel? Kjá náhí, kixin janhan kjaxian israelitana la t'ikiníxinna ch'ín Abraham la ko k'uaxrjeníxinna ch'ín Benjamín.

² Kixin ósé tsíkjeyá Dios tí sín israelita kixin ts'óna sín chjasén ch'án. A ntá ijie la kjá sinchek'itjáyanhya ch'án sín. ¿Á noahyará jahará nkexrí nixja xroon itén Dios tí chrónka ch'ín profeta Elías nkexrí nixjehē ch'án Dios tjanchia ch'án jìe kuènte tí sín Israel? Mé ntáchro xíkìhi:

³ “Ínchéni, jehe sín k'óyán sín tí sín chrónka itán la ko k'óxíka sín tí altar kuèntá ntá jehóni kuítóheni tjechónni la tjinkaon sín kjaxin chrók'óyán sín tí jeheni.”*

⁴ A ntá Dios kjuátehe ch'án kixin: “Naxā kuítóhe yato mil chojni kuítekaon sín tí janhan kjuíxienhya sín toch'in sín tí nkehe tsíkjanoya Baal.”†

⁵ Ntá kjaxin xíkaha ijie naxā kuítóhe iso tí sín naxā tinkáchónki Dios. Kjuasáyé Dios kixin

* **10:20** Isaías 65.1 † **10:21** Isaías 65.2 * **11:3** 1 Reyes 19.10, 14

† **11:4** 1 Reyes 19.18

kuikonóhe ch'án tí sín la tsíkjejá ch'án kixin tsaá iso ti jehe sín.

⁶ Mé xikaha kjuasáyé Dios sinchekaá ch'án tí jehe sín kixin jehya tí xra kjuích'e sín chrókuaáxin sín. Náhí. Kjuasáyé Dios mé sinchekaá sín ch'án. Kixin tí xra chrókjuich'e sín ntá chrókuaáxin sín la jehya kjuasáyé Dios tí xikaha.

⁷ A ntá tí xikaha la, ¿nkexrí? Tí sín israelita la k'uitjahya sín tí nkehe xritjejá sín. A ntá tí sín kjueyá Dios la k'uitja sín. A ntá tí sín í so a la icha asén sín la kuítekakonhya sín.

⁸ Éxí ntáchro xroon itén Dios kixin: “Dios kjuanjonhya kjuachaxin chrókienxín tí sín a la ko mé kjaxin xikaha naxa sítonhen tí yaon ijie. La kjuanjonhya ch'án kjuachaxin kixin chrók'uikon sín la ko chrókienxín sín.”‡

⁹ Kjaxin tsintáchro ch'ín David kixin: Tí kia tjasin sín mé tjasixín sín jie, tsjasótexín sín.

¹⁰ Tí ikon sín ts'ikonxínhya sín kixin ts'óna sín ntakótán
ntá tí jie kuènte sín mé jnkochrín yámá sín. §

Tsaá tí sín jehya sín judío

¹¹ A ntá ijie tjánchánkiá: Tí sín judío la tí kjuasin sín jie la ¿á ó naá kuítóexón Dios tí jehe sín? Kjá náhí. Tió kuítekakonhya tí sín judío a ntá tí sín jehya judío la mé kjuacha sín kuaá sín. A ntá tí sín israelita la kónínkaon sín kixin kjuachahya sín.

¹² A ntá tí jie kjuasin tí sín judío, a ntá kuítóhe Dios tí jehe sín, a ntá tí sín jehya judío antsí k'uitja

‡ 11:8 Deuteronomio 29.4; Isaías 29.10 § 11:10 Salmo 69.22-23

sín nkexrí tsinkáchónki sín Dios. A ntá tí nkehe ntoáhya kjuích'e tí sín judío ntá tí sín jehya judío kjuacha sín kuaá sín. A ntá tí chrókjan tí sín judío chrókuitekaon sín Cristo la antsí má náxrjón tíha.

¹³ Chonta iso nkehe chrókuinhínrá jahará jehya judíorá kixin Dios mé chr'ánna kixin tsjakohá tí sín jehya judío la antsí tjetooan tí xra kuènte Ìnchéni chrókjuít'a.

¹⁴ Tjínkavan kixin tí sín chjasenná chrókóhjinóxinhin sín kixin jahará tinkachónkirá Dios kixin ntá chrókjuacha chrókuaá iso tí jehe sín.

¹⁵ Kuítóhe Dios tí sín judío, a ntá iso tí sín jehya judío k'uitja sín tí kjuaxróxin kuènte Dios. A ntá tí chrókuitekaon tí sín judío kjaxin la yóhe éxí chróxechón chojni tsík'en tí jehe sín.

¹⁶ Tí chrókjuinchetjóá Dios tí niotja xrankíxixín chrók'óna tí ich'o la ntá kuenté tí ch'o chrókjuinchetjóá ch'án. A ntá kjaxin tí chrókjuinchetjóá ch'án tí nuèé ijnko nta la kjaxin kaín tí chaon tí nta chrókjuinchetjóá ch'án.

¹⁷ Ntá isó tí sín judío la éxí iso chaon tí nta olivo mé xikaha tsíchrinjin la ntá jahará la éxí ijnko chaon nta olivo nteje tsík'óna injerto mé xikaha ts'ejóchónxin tí nta chaon tí tronco tí nta olivo jína xráxín tjechón.

¹⁸ Ntáchrohyará kixin tí chaon tí nta la antsí jína. Íchá jína tsontáchrora kixin jehya tí nta t'etuennen tí nuèé nta. Náhí. Tí nuèé mé tsjinkitsa tí nta mé xikaha tí jahará.

¹⁹ Ntá jahará tsontáchrora kixin: “A ntá tí chaon tí nta la tsíchrinjin kixin ntá jeheni tsitoheni lùké tí nta chaon tsíchrinjin”.

20 Tíha la chaxín. Kjánchó chrínjin kixin kuítekakonhya Dios. A ntá jahará la tjejorá ntiha kixin tinkachónkirá Dios. A ntá chrokjuinchehnkehyará. Íchá jína chróchrakonrá.

21 Kíxin Dios la kuikonóehya ch'án tí nta chaon kuènte tí nta tronco la ntá mé xikaha kjaxin tí jahará la tsikonóahyará ch'án.

22 Tsjehérá kixin Dios la imá jína kjánchó kjaxin sinchekjasóte ch'án tí sín titekakonhya. A ntá jína ch'án la kjuínkítsa ch'án tí jahará. Kjánchó chrók'uejorá jnkójina éxí tjinkaon tí jehe ch'án. A ntá tí nání la chaxín jahará la tsítóhará ch'án.

23 A ntá tí sín judío tsítóhe sín tí nkehe ntoáhya k'uékjich'e sín ntá jehe ch'án kjónté senó kóchrínjin ch'án la ntá ijie sinchetséxin ch'án tí tronco inaá kixin jehe ch'án la imá chóna ch'án kjuachaxin kixin xikaha sich'e ch'án.

24 A ntá jahará jehya judíora mé tsíkóchrínjinrá ch'án nta olivo nteje. A ntá antsí má xra tsotséxin tí nta olivo jína. A ntá tí sín judío la nta chaon kuènte tí tronco nta olivo jína la antsí xrahya tsjatsuenhen tsotséxin kichó inaá kixin ó nta chaon kuènte.

Tí tsjixín ntá tsaáxin tí sín Israel

25 Kíchóni, tjínkavan tsonohará tí nkehe jehó Dios nohe kixin sinchehnkehyará jahóra kixin ó nohará. Mé tí sín Israel tsitekakonhya sín hasta ts'ixenjian kaín tí sín jehya judío tsitekaon.

26 Tió xikaha tsonhen ntá kaín tí sín Israel tsaá sín kixin tí xroon itén Dios ntáchro kixin:
Tí nkexro sinchekaáni mé tsixin ch'án chjasin
Jerusalén

la tsjatsen ch'án ti jië kuènte tí sín tsík'axrjeníxin
ch'ín Jacob.

27 Tíhi mé kjuachaxin nixin kuèntana ts'áyéhe tí
jehe sín

kíxin janhan mé kjuatsìyan ijíé sín.*

28 Xikaha kíxin tí tan nixin tsaáxinni ntá tí sín
judío mé tsonínkakohen sín Dios kíxin ntá jahará
ts'ayéhérá tí nkehe kuènte Dios. Kjánchó Dios naxa
tjuèhe tí jehe sín judío kíxin jehe ch'án tsík'jeyá ch'án
tí sín tsík'axrjeníxin tí jehe sín.

29 Kíxin tí kaín nkehe kjuanjon Dios la tsakit-
sjehya ch'án la ko tsítóehya ch'án tí sín tsík'íyehé
ch'án.

30 Senó la jahará k'uékítekákonhyará Dios a ntá
ijie la tí sín judío titekakonhya sín. A ntá jahará la
kjónté la kuikonóahará Dios.

31 Mé xikaha jehe sín kuítekakonhya sín Dios la
ntá kjónté xikaha la jehe ch'án tsíkonóehé tí jehe
sín éxí kuikonóahará ch'án.

32 Kíxin Dios la kuítóhe ch'án kaín chojni kíxin
chrókjuasin sín jië kíxin ntá tsjakoxxin ch'án tí
kjuachaxin kuènte ch'án kíxin sinchetjóá ch'án
kaín sín kjónté chojni chóna jië.

33 A ntá tí kjuachaxin kuènte Dios la imá jíé
la ko imá nohe ch'án. Ninkexró tsjachahya
tsochronkaxín nkexrí tjenkayáxin ch'án la ko
ninkexró tsjachahya tsienxín tí ntia kuènte ch'án.

34 Ntáchro xroon itén Dios kíxin: “¿Xá nkexro
chrókienxín nkexrí tjenkayáxin Ìnchéni la xá
nkexro chrókjuinkitsa chrókjuakohe tí jehe ch'án?

* 11:27 Salmo 14.7, Isaías 59.20

³⁵ ¿Xá nkexro kjuanjon nkehe senó k'uáyéhe Dios a ntá ijie tjinkaon chrók'uáyéhe ínaá?"†

³⁶ Kíxin kaín nkehe la tixín tí tjen Dios kíxin kaín nkehe la kjuích'éna ch'án kíxin jehe ch'án chóna ch'án. Mé xikaha tjancheheni kjuasáyé Dios jnkochrín. Amén.

12

Chjehérá cuérporá Dios kíxin sinchetjóá ch'án

¹ Mé xikaha kíchó ni, xrjanóahará kíxin Dios ó kuikonóahará ch'án ntá jahará chróchjehérá cuérporá Dios éxí ijnko nkehe tjechón kíxin jehe ch'án ó kjuíntatjóará ch'án la mé xikaha chrókóxrjínjin ch'án. Tíhi mé ijnko nkehe ntoá t'ichjánxin chróchjéheni ch'án.

² Chrokóxrjíanhyará tí nkehe siín chjasintajni. Náhi. Chrókónixin tí nkehe tjenkayáxinrá kíxin jína chrókjuenkayáxinrá. Xikaha ntá chrókónohará kíxin nkexrí tjinkaon Dios kíxin ntoá chrók'uejorá éxí tóxrjínjin ch'án.

³ Kjuasáyé Dios kjuanjon ch'án tí xra tjet'aha ch'án. Mé xikaha nixjahará kaín rá kíxin chrókjuenkayáxinhyará kíxin imá tjetóanrá. Náhi. Chrókjuenkayáxinrá jína éxí tí kjuachaxin tjáhará Dios éxí nkexrí tinkachónkirá ch'án.

⁴ Mé xikaha ijnko cuerpo la nchónhya parte chóna. A ntá tí parte la jehya jnkokón xra chrókjuich'e.

⁵ Mé kjaxin xikaha tí jeheni kjónté nchónhyani la ts'ónani jnkokóá cuerpo kuènte Cristo. Mé xikaha

† 11:35 Isaías 40.13-14

jnkokoá chrókjuenkayáxinni ḱixin ó k'ónani jnkokoá cuerpo.

⁶ Dios kjuanjon nchónhya clase xra éxi tjinkaon ch'án chróchjéhe ch'án jnkojnko chojni tí xra. Ntá t'ichjánxin jína sich'eni tí xra kjuanjon ch'án. A ntá tí kjuanjon ch'án kjuachaxin ḱixin tsochronkaxínni tí tan kuènte ch'án ntá t'ichjánxin sich'eni tí xra éxi titekaonni ch'án.

⁷ A ntá tí kjuanjon ch'án xra tsjinkitsani í jnko nkexro ntá t'ichjánxin jína sich'eni tí xra a. A ntá tí nkexro tsík'áyéhe kjuachaxin tsjako la t'ichjánxin jehó tí xra a chrókuako.

⁸ Tí nkexro tsík'áyéhe kjuachaxin nchexraxinkaon í jnko nkexro la kaín asén chrókuich'e ch'án tí xra a. A ntá tí nkexro tsjanjon ichrén nkehe la chrókójiehya chrókuanjon ch'án. A ntá tí nkexro t'etōan la jína chrókuich'e ch'án xra la ko tí nkexro chrókuinkitsa tí sín chóntahya la kjuaxróxin chrókuinkitsa sín.

Tí nkehe chrókuich'e tí sín tinkáchónki Cristo

⁹ Kaín asánrá chrótjuèherá ḱichuára. Chrókujtohéra tí nkehe jínahya tjenkayáxinrá la chrókjuenkayáxinrá tí nkehe jína.

¹⁰ Chrótjuèherá ḱichuára la ko chaxín chrókuikosáyehéra ḱichuára.

¹¹ Chrókósáhyará la chrókuich'eherá Inchéni xra kaín asánrá.

¹² Chrókócháhará ḱixin tjejóchonhénrá la chrókóninkákonhyará kjónté chrókuasótiará. Chrókujtoéhyará chrónixjehéra Dios.

13 Chrókuinkitsará tí sín tinkáchónki Ìnchéni tí chóntahya sín nkehe sine sín. Chjehérá kjuachaxin ts'ejó tí sín tsjijnixjahará sín.

14 Nixjehérá Dios la tsjanchehérá ch'án kixin sincheyaon ch'án tí sín chonkíhará. Tjanchehérá Dios tsjinkitsa tí jehe sín la jehya kixin chrókóninkákonhénrá sín.

15 Tócháhakoará tí sín tjejóchéhe sín la ko tí tjejótsjánka sín la koírá chrótsjankará.

16 Kjuaxróxin chrók'uejorá. Chrókuinchehnkehyará. Náhí. Chrókóyóhárá éxí tí sín nòa. Chrókuinchehnkehyará kixin nohará.

17 Chrókuich'ehyará jínahya tí sín kjuít'ahará ichrén nkehe jínahya. Náhí. Íchá jína chrókuákoxinrá nkehe jína kixin chrók'uikon kaín chojni.

18 Chrókuéyará jnkojína chrók'uejorá. Exí nkexrí chrókuachará la kjuaxróxin chrók'uejorá kaín rá.

19 Tjuahará kíchó ni, la chrókuinchekjásótehyará jahórá tí sín ichrén nkehe kjuít'ahará. Náhí. Tìtohérá kixin Dios sinchekjasóte tí sín a. Ntáchro xroon itén Dios kixin: “Ixra kuèntana sjintakitoaxián tíha. Janhan tsjénkahá tí sín a, ichro Ìnchéni.”*

20 Kjaxin ntáchro xroon itén Dios kixin: “Tí sín nínkakonhan t'énxín sín kjinta la chróchjehé sín nkehe chrókjóné sín la tí t'énxín sín nta la kjaxin chróchjehé sín nkehe chrók'ui sín. Mé xikaha chrókuich'e kixin chrókósuèhe sín kixin tí nkehe kjuích'e sín.”†

* 12:19 Deuteronomio 32.35 † 12:20 Proverbios 25.21-22

21 Chrókujtoéhyará kixin chrókjuacha tí nkehe jínahya chrók'uetuanhanrá. Náhí. Chrókjuich'erá tí nkehe jína kixin chrókjuachahya tí nkehe jínahya chrók'uetōan.

13

1 Kaín chojni t'ichjánxin sinchexiteyéhe sín tí gobierno kixin tí kjuachaxin chóna sín la Dios tsíkjanjon kixin kohya nijnko gobierno chrók'uejó tí jehya kjuachaxiēn Dios.

2 Mé xikaha tí sín tjanjonko tí sín t'etoan la kjaxin nínkakonhen sín tí nkehe k'uetōan Dios. A ntá tí sín xikaha ch'e la mé jehe sín tjejá sín jie tsjasótexín sín.

3 A ntá tí sín gobierno t'etoan la sinchekjasótehya sín tí nkexro titekaon ch'e nkehe jína. Náhí. Tsonínkakonhen sín tí nkexro ch'e tí jínahya. Tí tjinkáonrá tsonínkakuanhyará sín la chrók'uejorá jnkójina. Chrókjuinchexiteyéherá sín kixin chrókónínkakuanhyará sín.

4 Kixin Dios k'uetōan tí xra tjejóch'e sín kixin ntá jahará la jína chrók'uejorá. A ntá tí chrókjuich'erá nkehe jínahya la chróchrakonrá kixin jehya chónkó tjejó tí gobierno. Náhí. Chóna sín kjuachaxin sinchekjasótiará sín kixin jehe sín la Dios k'uetōan tjejó sín tí xra a kixin sinchekjasóte sín tí sín jínahya tjenkayáxin.

5 Mé xikaha t'ichjánxin sinchexiteyéherá tí gobierno la jehya jehí kixin chrókjuinchekjasótiahará sín. Náhí. Ó jehí jahará chróxráxinkáonrá kixin t'ichjánxin sinchexiteyéherá sín.

6 La kjaxin jehya táhó. Náhí. T'ichjánxin chrókjuenkehéherá gobierno tí chichaon kuēnte tí

xra ch'erá tjanchia sín kixin tí gobierno la Dios k'uetoan tjejó sín t'etoan sín.

⁷ Kjaxin chrókjuenkehérá kaín chojni tjasikéherá. Tí nkexro síká kuènte xra la chrókjuenka sín kuènte tí xra, la tí nkexro síká ichrén nkehe nchekji ntá tíha kjaxin chrókjuenka sín, la kjaxin chrókjuíkosáyehérá tí sín t'etoan.

⁸ Kjaxin chrókjuasikéhyará ninkexró. T'ichjánxin chrótjuèherá kíchuará kixin tí nkexro tjuèhe kíchó la mé xikaha kjuínchexiteyá tí nkehe k'uetoan tí ley.

⁹ Kixin ntáchro tí mandamiento kixin: “Tjakéhya asánrá í jnko chojni chjin la ko t'oyánhyará kíchuará la ko teehyará la nixjahyará kjuach'ia kuènte í jnko chojni. La ko tjaké hya asánrá nkehe ókjé:”^{*} Kaín tíha la ko í so nkehe t'etoan Dios mé tienxínni t'axrjexín kixin: “Chrótjuèheni kíchó ni éxí tjuèxín asénni.”

¹⁰ Tí chojni tjuèhe kíchó la ninkehó nkehe jínahya sich'ehe kíchó. Mé xikaha chrótjuèhe kíchuará la mé xikaha mé chróxiteyá jína tí nkehe nixja tí ley.

¹¹ Kaín tíha chrókónoheni tí tjejóni kixin ó kui tí hora chrók'uejótsjeheni chrók'uajuahyani. Tí nkexro tsaáxinni la í séhya itsi ch'án ijje, a ntá tí kjuankíxinni kuítekaonni itén ch'án la ísé tsixin ch'án.

¹² A ntá tí tie la í séhya tsjak'e kixin ó tsi tí t'inkáséyan la chrókuítóheni tí nkehe ch'eni kuènte sítié la chróchóntani kjuachaxin kuènte Nchakuen Dios kixin tsjinkítsa ts'ajini tí t'inkáséyan, éxí ijnko soldado t'inkáyate ch'án ka tsík'óna chica kixin kohya nkehe tsonhen ch'án.

^{*} **13:9** Éxodo 20.13-15, 17; Deuteronomio 5.17-19, 21; Levítico 19.18

13 Chrók'uejóni jnkojína éxí nkexrí chrók'uajini chaxín ntoá tí t'inkáséyan a. Chrókjuasinhyani kia chrókjuanjonxin chojni la ko chrókókoanhyani la ko chrókjuenkayáxinhyani chróchóntani nchónhya chojni chjin la ko chrókjuenkayáxinhyani tí nkehe ntáchro asénni la ko chrókjueyáhyani kjuanínkaon la ko chrókóchjinoxíenhyani.

14 A ntá jahará tákjára tí kjuachaxin kuènte Ìnchéni Jesucristo tsjinkitsará la tíha mé éxí chrók'uínkayára nkehe tsík'óna chica kixin kohya nkehe chrókónhanrá. La ko chrókjuenkayáxinhyará tí nkehe ntoáhya tjenkayáxin chojni jínahya.

14

Tjontahyará kíchuára

1 A ntá kjónté ijnko chojni kánhyó tinkáchónki Ìnchéni la chrók'uejokoará ch'án la ko chrókjontahyará ch'án kjónté kánhyó nohe ch'án.

2 A ntá iso sín chaxín nohe sín la tjinkaon sín chrókjóné sín kaín nkehe. A ntá tí sín kánhyó tinkáchónki sín Ìnchéni ntá tjinkaon sín chrókjónéhya sín nto, ntá kayoa ó chrókjóné sín.

3 Tí nkexro chrókjóné kaín nkehe chrókjoniehya tí nkexro tjinkaon chrókjónéhya nkehe. A ntá tí sín chrókjónéhya nkehe chrókjontahya sín tí sín chrókjóné sín kaín nkehe kixin kjónté xíkaha la Dios tsakja tí jehe sín.

4 ¿Xá nkexro jaha kixin chrókjóna tí nkexro ch'ehe xrá í jnko nkexro? Tíha la xrá kuènte tí lámóé ch'án tsontáchro á jína kjuích'e ch'án xrá o náhí. A ntá kjá tsjak'e ch'án jína kixin Ìnchéni chóna

ch'án kjuachaxin tsjinkitsa ch'án tsjak'e tí ch'ín a jína.

⁵ Iso sín tjenkayáxin sín kixin imá tjetóan ijnko yaon a ntá í jnko yaon la náhí. La í so sín ntáchro sín kixin kaín yaon la ó jnkokón. Ntá jnkojnko sín la jehó sín chrókjuenkayáxin sín kixin nkehe tí chaxín titekaon sín.

⁶ Tí sín xraxinkaon tí yaon la tjikosáyehe sín Ìnchéni la kjaxin tí sín tinkáchónkihya sín xikaha la tjikosáyehe sín Ìnchéni kjónté xraxinkakonhya sín tí yaon. Kjaxin tí sín ine kaín nkehe la ine sín kixin xikaha tjikosáyehe sín Ìnchéni la kjaxin tjanchehe sín kjuasáyé Dios. A ntá kjaxin tí sín nehya kaín nkehe la xikaha mé tjikosáyehe sín Ìnchéni la kjaxin tjanchehe sín kjuasáyé Dios.

⁷ Nijnko tí jeheni tjejóni kixin jehóni chrók'uetóanni la ko jehya jehí chrók'uenni.

⁸ Tí tjejóni la tjejóni kixin sich'ehe ni xra Ìnchéni la kjónté its'enni la kuènte ch'án tí jeheni. Méxra kjónté chrók'uejóchónni o kjónté chrók'uenni la kuènte ch'án tí jeheni.

⁹ Méxra xikaha ntá Cristo la ik'uén ch'án la ko xechón ch'án inaá kixin k'óna ch'án Ìnché tí sín tsík'en la ko tí sín tjejóchón.

¹⁰ A ntá jahará la, ¿nkekuènte tjóntará tí kichuárá o nkekuènte chontehará kaín sín kjuasáya? Kixin kaín ni tsóchjinani tí tjen Dios kixin tsontáchro ch'án á jína xra kjuích'eni o náhí.

¹¹ Ntáchro xroon itén Dios kixin:

Méxra janhan takjénxian asenná, ichro Ìnchéni, kixin tí tjèn la ts'ejóxin toch'in kaín chojni

kíxin kaín chojni la tsjanchia sín kjuasáya kíxin
janhan mé Dios kuènte sín.*

12 Mé xikaha jnkojnkoní chrókónoheni kíxin
tsochenkani Dios nkexrí kjuích'eni.

Tjachruehyará kichuára

13 Méxra chrókjóntahyará kichuára. Íchá jína kíxin
ninkehó nkehe chrókjúich'ehyará kíxin ntá tí sín
kíchó ni chrókjuasinxinhya sín jje kíxin tí chrókjuasin
sín jje ntá xikaha chrók'uitjáyanxín tí tinkáchónki
sín Inchéni.

14 Janhan tinkáchónkia Inchéni Jesús la ntá
xikaha ó nòna kíxin kohya ninkehó nkehe jehí
tjuáhya. A ntá ijnko nkexro tjenkayáxin kíxin jehya
nkehe jína tíha ntá chaxín tjuáhya tí nkehe kíxin
xikaha tjenkayáxin ch'án.

15 Tí tjenkayáxin tí kichuá kíxin tí nkehe
inte la ntoáhya a ntá tí xikaha ch'e la tjuèhya
tí kichuá. Kíxin jehya tí nkehe chrókjónte ó
chrókjúinçek'itjáyanxián tí kichuá kíxin Cristo
k'uenyákonhen ch'án kjaxin.

16 Chrókjúich'ehyará nkehe jínahya kíxin ntá
xikaha chrók'uántaxínhin sín tí nkehe jína tin-
kachónkirá.

17 Kíxin tí kjuachaxién Dios la jehya tí nkehe
chrokjóneni o tí nkehe chrokuini. Náhí. Tí tjen
tí kjuachaxién Dios la chrók'uejóni jnkojína la ko
kjuaxróxin chrók'uejóni la ko chrókóchéheni kíxin
chóntani Nchakuen Dios.

18 Tí nkexro ch'ehe Cristo xra mé
chrókjúinchechéhe Dios la ko chrókjúinchechéhe
chojni.

* 14:11 Isaías 45.23

19 Mé xikaha chrókjueyáni kaín tí nkehe tjikao kjuaxróxin kixin ntá tsjinkjitsani tí sín kichó ni kixin ntá kjaxin sín antsí chrókuinkáchónki sín Ìnchéni.

20 Chrókjuinchek'itjányanhyará tí xra kuente Dios kixin tí nkehe chrókjónterá ó kixin kaín nkehe chrókjónterá la ó tsíkjinchetjóá Dios. Tí jínahya la tí chrókjóneni ókjé nkehe ntá xikaha la í so chojni chrók'uitjányanxín tí nkehe tinkáchónki sín.

21 Ntá íchá jína chrókjóntehyará into la ko chrók'uihyará vino la ko ninkehó nkehe chrókjuich'ehyará tí xikaha chrókjuasixín jie kichuára.

22 Tí nkehe tinkachónkirá la jahóra chrókónohará kixin Dios la tjetsjehe ch'án. A ntá jína tsjak'e tí nkexro tí chrókjuasixínhya ch'án jie tí nkehe tjenkayáxin ch'án.

23 A ntá tí nkexro ine nkehe la tjenkayáxin sín kixin tsjasixín sín jie ntá chaxín xikaha yámá sín jie kixin kénhya asén sín kjóne sín tí nkehe. La tió kénhya asén sín tjenkayáxin sín la ó kjuasin sín jie.

15

Nchechéhérá kichuára la jehya jahóra

1 Tí antsí tinkáchónkini Ìnchéni ntá chrókjuinkjitsani tí sín kánhyó tinkáchónki tí jehe ch'án la chrókjuich'ehyani tí nkehe chrókóchéxinni jehóni.

2 Kjaxin kaín ni chrókjuinchechéheni kichó ni kixin chrók'uejó sín jína la ko kixin antsí chrókuinkáchónki sín Ìnchéni.

3 Kixin kjaxin Cristo kjuich'ehya ch'án tí nkehe chrókóchéxin ch'án jehó ch'án. Náhí.

Kjuínchexiteyá ch'án éxí ntáchro xroon itén Dios kixin: “K'uinka kjuasótexinna kaín tí kjuanínkaon chóna tí sín nínkakohen Dios.”*

⁴ Kaín nkehe chrónka xroon itén Dios senó la tsíkjin sín ósé kixin chrókónoheni kixin ntá chrók'uejóchónhenni la chrókónínkakonhyani kixin tíha mé nchechéheni.

⁵ Dios, mé tí nkexro tjinkitsani la ko nchechéheni, la kjaxin tsjinkitsa ch'án tí jahará kixin ts'ejorá jnkójina la ko jnkokón tsjenkayáxinkoárá kichuárá kixin xikaha kjuakoxin Cristo Jesús.

⁶ Kixin kaín ni jnkokoá chrók'uákjenxinni Dios la chrókjuancheheni kjuasáyé ch'án mé jehe ch'án mé It'é Ìnchéni Jesucristo.

Tí tan jína xrakøhe tí sín jehya judío

⁷ Chrókjuánjonrá kjuachaxin ts'ejó í so chojni la chrótjuèherá sín kixin éxí Cristo tsík'áyéhe ch'án tí jahará mé xikaha tsjikosáyehérá Dios.

⁸ Janhan jína chróntáxrjan kixin Cristo ikui sich'ehe xra tí sín judío kixin tsoxiteyá tí nkehe tsíchenka Dios tí sín tsík'axrjeníxinni ósé kixin xikaha tsjakoxin kixin Dios la jína ch'án la sinchexiteyá ch'án tí nkehe tsíntáchro ch'án.

⁹ La kjaxin ikui ch'án kixin kjónté tí sín jehya sín judío la chrokjuanchehe sín kjuasáyé Dios kixin kuikonóhehe ch'án sín éxí chrónka tí xroon itén Dios kixin:

Janhan la ko tí sín tjejó ókjé nación mé ts-jancheheni kjuasáyé Dios

* 15:3 Salmo 69.9

la ko tsotsjeni himno kixin ts'ákjēnxinni ihnié
ch'án.†

10 Kjaxin ntáchro í jnko parte xroon itén Dios ínaá
kixin:

Tsocháhaakoará kaín tí sín kuèté Dios.‡

11 Kjaxin ntáchro xroon itén Dios ínaá kixin:

Tjancheherá kjuasáyé ìnchéni Dios kaín rá kjónté
jehya judíorá

mé kaín chojni chrókjuanchehe sín kjuasáyé Dios.§

12 Kjaxin ch'ín Isaías tsíkjin kixin:

Ts'axrjenixin ch'ín Isaí ijnko nkexro

la ts'etuenhen ch'án kaín tí sín jehya judío,

a ntá tí sín a mé tsinkáchónki sín tí nkexro a.*

Mé xikaha ichro itén Dios.

13 Dios mé tjetjanjon ch'án kjuachaxin
tjejóchónhenni la jehe ch'án nchechéhēni ch'án la
tjanjon ch'án kjuaxróxin ts'ejóni kixin titekaonni
tí jehe ch'án kixin ntá ts'ánkí tí kjuachéhe
tjejóchónhenni kjuachaxién Nchakuen ch'án.

14 Kíchóni, chaxín tónòna kixin jahará la jína tje-
jorá la kaín xín kjuaxrexinkaon jína tjenkayáxinrá
la nohará tsjínkĩtsará chénkará kíchuará.

15 La kjónté xikaha la chrakonhya ikjian tí
xroon i chr'anhánrá xrjanka kaín tí nkehe kixin
chrók'uitjāyanhyará chróxráinkáonrá kaín nkehe.
Mé xikaha it'á tí xrā kixin kjuasáyé Dios kjuanjon
ch'án tí xrā.

16 Kixin sít'aha Jesucristo xrā tsotjanka tí sín
jehya judío tí itén Dios. Tí xrā mé tjákua tí tan jína

† 15:9 2 Samuel 22.50; Salmo 18.49 ‡ 15:10 Deuteronomio 32.43

§ 15:11 Salmo 117.1 * 15:12 Isaías 11.10

tsaáxin chojni ḱixin ntá janhan tsjánjuan tí sín jehya judío ts'áyéhe Dios éxí ijnko nkehe tsoxrjínhin ch'án ḱixin Nchakuen ch'án kótjuáxin sín.

17 Janhan mé ijnko chojni tinkáchónki Cristo Jesús la mé xikaha síin kjuachaxin tsochána ḱixin t'aha xra Dios.

18 Chrokjuahya tsohnke tsontáxrjan í jnko nkehe. Jehó tsoxrjanka nkexrí tí kjuachaxin kjuanjon Cristo chjina ḱixin tsotjanka tí sín jehya judío tí itén ch'án ḱixin tsitekaon sín Dios. Ntá xikaha kuítekaon sín ḱixin tí itan kjuákua la ko tí nkehe jína kjuít'a.

19 Ḱixin tí kjuachaxién Dios mé kjuákoxián tí kjuásian kjuaxroan la ko kjuákoxián tí kjuachaxin kuènte Nchakuen Dios. Mé xikaha kjuintaxíxin kjuákua tí tan jína tsaáxin chojni Cristo xrankíxín chjasin Jerusalén la nkuíxín chjinaxón ntiha la hasta estado Ilírico.

20 Mé xikaha tjínkavan tsjíkjàkua tí tan tsaáxinni tí chjasin naxa tienhyé sín ihnié Cristo ḱixin tí janhan tjínkakhya tsjírónkaxián tí xra kuènte í jnko chojni xráxín tjech'e xra.

21 Íchá jína éxí ntáchro xroon itén Dios ḱixin: Chrókuinhin tí sín naxa kienhyé sín tí tan kuènte ti jehe ch'án.
La ko chrókienxín tí sín naxa kienhyé tí tan kuènte ch'án.†

Ch'ín Pablo tjenkayáxin ch'án sátsji ch'án chjasin Roma

22 Nchónhya veces tjínkavan chrókjuasántsjaha tí jahará kjánchó naxa xitjahya kjuasán ntiha.

† 15:21 Isaías 52.15

23 Kjánchó ijie la ó kjuixinna tí xra nkuíxín tí tjèn ntihi. Ntá itsjé nánó tjínkavan chrókjuasántsjahá tí jahará

24 a ntá ijie ts'atsínka tsonixjahará tí sátsjia nación España. Ntá tsochàna ts'íkuan tí jahará ntá tsjixin ntá chr'éxin tjínkavan kixin jahará tsjínkĩtsará tí sátsjia.

25 A ntá ijie la sátsjya chjasin Jerusalén, sátsjĩkian tí nkehe tsjinkĩtsa tí sín kíchó ni ntiha.

26 Kixin tí sín estado Macedonia la ko estado Acaya kjuenkayáxin sín tsjejo sín chichaon kixin tsochr'énnen sín tí sín kíchó ni ntiha tsochjéhe tí sín nòa tjejó chjasin Jerusalén.

27 Jehe sín kóxrjínhjn sich'e sín xikaha kixin tí sín judío tinkáchónki Cristo kjuínkĩtsa tí jehe sín tsonhe sín itén Dios. Ntá ijie la jehe sín chrókjuinkĩtsa sín inaá chrókjuanjon sín iso tí nkehe chóna sín chrók'uáyéhe tí sín judío tinkáchónki Ìnchéni.

28 A ntá tió tsjixin tí xra la ts'áyéhe sín tí chichaon la ntá janhan sátsjia España la ts'atsínkua tsonixjahará.

29 Ó nòna kixin tió sátsjia la Cristo mé imá sincheyaon ch'án tí janhan la ko tí jahará.

30 Kíchóni kjuasáyé Ìnchéni Jesucristo la ko tí Nchakuen ch'án tjanjon kjuachaxin tsotjuèheni kíchó ni mé xrjannóahará kixin jnkokoá chrókjuenkayáxinni kixin tí xra tjét'a la ko chrónixjehérá Dios kixin tí janhan.

31 Tjanchehérá Dios kixin tsjinkĩtsa ch'án tí janhan kixin kohya nkehe tsonna kixin kaín tí sín titekakonhya Dios siín chjasin Judea. La ko

tjanchiará kixin jína sátsjikian tí nkehe tsjinkitsa tí sín kichó ni tjejó chjasin Jerusalén kixin jína chrók'uáyéhe sín.

³² Ntá tí tjinkaon Dios la tsochàna tsjasán ti tjejórá jahará la ko kjuaxróxin tsjak'é tí tsjasántsahará.

³³ Dios tjanjon kjuaxróxin ts'ejokoará kaín rá. Amén.

16

Ch'ín Pablo nixjehe ch'án tí sín chóxin ch'án

¹ Tétuanhanrá tsjínkitsará tí tjan kichó ni Febe ch'e tjan xra ninko chjasin Cencrea

² mé tjanjonrá kjuachaxin tsjak'e tjan kjuachaxién ihnié Ìnchéni éxí ch'eherá í so sín kichó ni tinkáchónki Ìnchéni. Tsjínkitsará tjan ichrén nkehe t'ichjánxinhin tjan kixin jehe tjan kjaxin kjuínkitsa tjan nchónhya chojni la kjaxin kjuínkitsa tjan tí janhan.

³ Nixjehérá tjan Priscila la ko ch'ín Aquila. Jehe sín jnkokoá kjuích'ekoni xra kixin kjaxin sín mé ch'ehe sín Cristo xra.

⁴ Jehe sín chrók'uenxín sín kixin kjuínkitsana sín tí janhan mé xikaha tjaha sín kjuasáya la jehya janhván, kjaxin kaín sín kichó ni ninkoé tí sín jehya judío.

⁵ Nixjehérá kjaxin kaín kichó ni tóchjina ntoe tjan Priscila la ko ch'ín Aquila. Nixjehérá tí ch'ín choxian jína Epeneto mé jehe ch'án la saoxín kuítekaon ch'án Cristo estado Acaya.

⁶ Nixjehérá tjan María kixin kjaxin tjan kjuích'e tjan xra tí tjejórá ntiha.

⁷ Kjaxin nixjehérá tí sín tsíkjixin chjasenná mé ch'ín Andrónico la ko ch'ín Junias. Tí k'uikjèna ntöechiso la kjaxin tí jehe sín k'uikjehe sín. Kjaxin kaín tí í so sín apóstol la tjikosáyehe sín tí sín a. Jehe sín senó kuinkáchónki sín Cristo ntá chr'éxin janhan.

⁸ Nixjehérá ch'ín Amplias kixin jehe ch'án mé ijnko nkexro choxian la ko tjuahā tinkáchónki Ìnchéni.

⁹ Nixjehérá ch'ín Urbano kixin jnkokoá kjuít'akian ch'án xra kuènte Jesucristo la ko nixjehérá tí ch'ín choxian Estaquis.

¹⁰ Nixjehérá ch'ín Apeles. Jehe ch'án la kjónté nchónhya nkehe kónhen ch'án kjuasóte ch'án kixin tinkáchónki ch'án Cristo. Kjaxin nixjehérá tí sín kjéhya ch'ín Aristóbulo.

¹¹ Kjaxin nixjehérá tí ch'ín kjéhyana Herodión la ko kjaxin nixjehérá kaín tí sín kjéhya ch'ín Narciso kixin kjaxin sín tinkáchónki sín Ìnchéni.

¹² Nixjehérá tjan Trifena la ko tjan Trifosa. Kjaxin jehe sín kjuích'e sín xra kuènte Ìnchéni la ko nixjehérá kjaxin tí tjan kíchó ni Pérsida. Kjaxin kjuínkítsa tjan kjuích'e tjan xra kuènte Ìnchéni.

¹³ Kjaxin nixjehérá ch'ín Rufo, ijnko chojni tsíkjeyá Ìnchéni la ko nixjehérá tí ìné ch'án kjaxin kixin kjaxin tjan kjuínkítsa tjan tí janhan la éxí naná k'uíkuan tí jehe tjan.

¹⁴ Kjaxin nixjehérá ch'ín Asíncrito la ko ch'ín Flegonte la ko ch'ín Hermas la ko ch'ín Patrobas la ko ch'ín Hermes la ko tí í so sín kíchó ni tjejóko tí jehe sín ntiha.

¹⁵ Nixjehérá kjaxin ch'ín Filólogo la ko tjan Julia

la ko ch'ín Nereo la ko tí tjan kichó ch'án la ko ch'ín Olimpas la ko kaín tí sín kichó ni tinkáchónki Ìnchéni tjejóko sín ntiha.

¹⁶ Kjaxin tsehérá tja kichuára kjuachaxin ihnié Ìnchéni. Kaín tí sín ninko kuènte Cristo ntihi xraxinkaon sín tí jahará la nixjahará sín.

¹⁷ Kichóni, xrjanóahará kixin chrótsjehérá nkexro tí sín tjixrónkáxin chrók'óxíka tí sín jnkokóá tinkáchónki Ìnchéni. Jehe sín titekakonhya sín tí itén Dios kjuákohará k'uitjará. Tí xíkaha ch'e sín la chrók'uaxrjekjanxínrá ntiha.

¹⁸ Tí nkexro xíkaha ch'e la jehya Ìnchéni Jesucristo ch'ehe xra. Náhi. Jehí tjinkaon sín chrókjuixrónkáxin sín la nixja sín tí nkehe náxrjón ó la xíkaha ch'iyehé sín asén tí chojni naxa noehya.

¹⁹ Kaín chojni ó nohe kixin jahará la ó kuítekáonrá Ìnchéni. Mé xíkaha chàna tí janhan la tjínkavan chrókóxakonhanrá chrókjuich'erá xra jína. Jehya kixin chrókjuich'erá nkehe jínahya.

²⁰ Tí Dios tjanjon kjuaxróxin mé tjoka tsinkátja Satanás, í ts'etuènhya. A ntá Ìnchéni Jesucristo mé sintayaonrá ch'án.

²¹ Ch'ín Timoteo nixjahará ch'án. Jehe ch'án jnkokón ch'ekoni xra. La kjaxin ch'ín Lucio la ko ch'ín Jasón la ko ch'ín Sosípater, tí sín chjasenná, mé nixjahará sín.

²² Janhan Tercio ikjian tí xroon i k'uetqan ch'ín Pablo la kjaxin nixjahará kjuachaxièn Ìnchéni.

²³ Ch'ín Gayo nixjahará ch'án. Jehe ch'án kjuanjon kjuachaxin kjuak'é janhan ntqè ch'án la ko kaín tí sín kuènte ninko tójnkotsé ntqè ch'án. La

ko nixjahará ch'ín Erasto. Jehé ch'án mé tesorero kuènte chjasin la ko tí ch'ín kíchó ni Cuarto kjaxin nixjahará ch'án.

²⁴ Ìnchéni Jesucristo sincheyaon ch'án kaín tí jahará. Amén.

²⁵ Ntá ijie tsjancheheni kjuasáyé Dios kixin jehe ch'án tjinkitsa ch'án kixin jína chrók'uejorá éxí chrónka tí tan jína tsaáxinni la ko éxí kjuakoni kuènte Jesucristo. Tíha mé chaxín chrónka éxí Dios k'ue_{to}an nchenoheni ch'án tí nkehe ninkexró k'uénoehya desde k'óna chjasintajni.

²⁶ A ntá ijie kaín ni tsonoexínni nkexrí nixja xroon ikjin tí sín profeta kixin nkexrí k'ue_{to}an Dios itjen jnkochrín. Ntá kaín nkehe k'uénoehya ninkexró a ntá tsochóxin kuenté chjasintajni kixin tsinkáchónki sín la ko tsitekaon sín Dios.

²⁷ Itjen jnkokoá Dios la jehó ch'án imá nohe ch'án la jehó ch'án mé tjancheheni kjuasáya kixin tinkáchónkini Ìnchéni Jesucristo jnkochrín. Amén. Ó tjen.

**Tí Nuevo Testamento cuènte Inchéni
Jesucristo C'óna Nquìva
New Testament in Popoloca, San Juan Atzingo**

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

b9b09122-b3f6-59f0-9594-749907b32b5b